

東
華
續
錄

東華續錄

同治九十三

臣王先謙敬編

臣張式恭恭校

同治十一年壬申春正月丙戌朔元旦節停止筵宴○戊子諭軍機大臣等丁寶楨奏遵旨籌堵侯家林決口力疾銷假親往督工一摺山東侯家林決口關繫運道民生亟應及早堵塞丁寶楨因節氣已過立春爲期急迫力疾銷假親赴工次督率河工地方員弁擇日開工實屬勇於任事力爲其難卽著督飭在事人員將決口實力趕辦剋期完工該工員等果能勤慎從事著有成效准由丁寶楨破格保獎儻敢陽奉陰違有心遲誤卽著該撫嚴參從重治罪以儆玩泄堵築孟家莊河及侯家林決口兩處已由東省籌撥銀三十萬兩此外如尙有需款之處卽著丁寶楨覈實籌辦以

資應用喬松年以事難必成請於今冬舉辦固爲慎重餉需起見
惟此處決口若不堵塞將來漫淹曹兗濟十餘州縣若再向東南
奔注則清淮一帶更形喫重數百萬生靈所繫朝廷豈惜數十萬
帑金不爲力籌保衛此時丁寶楨旣已獨任艱鉅該河督務當與
之和衷共濟揀派熟諳河務各員迅赴工次交丁寶楨差委其餘
一切事宜亦應隨時商榷務臻妥善不得畏難苟安稍涉推諉將
此由四百里各諭令知之○己丑諭內閣欽恤庶獄仁政所先溯
查乾隆十一年嘉慶十一年道光十一年均 特頒省刑 諭旨
大沛 恩施亦越咸豐十一年 皇考文宗顯皇帝紹述 前徽
復頒行 曠典朕臨御以來仰承 兩宮 皇太后懿訓夙夜兢
兢以愛育黎元爲念茲當紀年開秩允宜祇遵 成憲以示矜恤
而迓祥和所有刑部及各省已經結案監禁人犯除情罪重大及

常赦所不原者毋庸查辦外其餘著大學士會同刑部酌量案情輕重分別請旨減等發落其軍流徒杖以下人犯一併分晰減等完結俾霑寬大之恩勉圖自新之路用副朕子惠兆民法外施仁至意○喬松年奏請飭撥銀兩豫修運河隄工允之○庚寅申諭奎昌等籌辦臺站事宜○以江蘇荆溪等處拏獲會匪予提督王兆有等優敘○予江蘇陣亡光祿寺署正銜盛家琳建祠○辛卯諭軍機大臣等劉長佑馮子材奏官軍剿辦越南匪徒殲擒悍逆攻克城巢一摺越南匪首阮四等滋擾太原連陷從化府等城經馮子材調派官軍分路堵剿殲擒悍匪鄧仕昌馮二陳汝景等多名十月初五日各營偪攻從化府城都司蔡簡宸等斬關殺入該逆四百餘人悉數聚殲初六日將從化府城克復買市之賊經遊擊李揚才等前後夾擊該匪窮蹙夜遁官軍跟蹤追剿疊克銀山

波賴匪巢勦辦尙爲得手劉長佑等見檄總兵劉玉成等會勦瓊山等處踞匪著卽督飭該將弁剋期勦辦掃蕩餘氛所有此次出力員弁准其擇尤請獎毋許冒濫前據劉長佑等奏俟海陽太原一帶賊匪芟除邊隅嶺定當回師列守衝要申嚴關禁卽著該撫等嚴飭在事將領將勦匪事宜迅速辦竣撤兵入關扼要防守以固邊圉而節餉需將此由四百里各諭令知之○撥部庫銀十萬兩充察哈爾軍餉○癸巳以孟春時享 太廟 上前期親詣行禮○左宗棠奏 臣疊奉寄諭飭催提督徐占彪迅赴肅州均卽隨時恭錄飛飭徐占彪欽遵辦理並飭省城軍需局暨署甘涼道蕭宗幹督飭各地方官購糧轉運以利師行並飭蕭宗幹先於涼屬廣籌儲峙以備裹帶及轉運甘州之需並隨軍親赴甘州代爲採購存儲以裕軍食疊據徐占彪蕭宗幹等稟報沿途車馱缺乏不

敷周轉該軍分三起拔行於十月先後行抵涼州徐占彪得陝回
竄近甘州之報卽率步隊六營馬隊一營十一月初六日先赴甘
州畱提督黃虎臣副將桂錫楨暫駐涼州候調繼進據稟抵甘州
後擬以兩營先赴高臺填紮成祿防所以便成祿出關俟蕭宗幹
將甘屬糧運辦有端倪續調駐涼五營前進緣成祿一軍久紮高
臺民間蓋藏早已搜括一空人逃畜少軍糧難於採購饋運難於
周轉徐占彪全軍若一氣開拔徑赴高臺事勢更多窒礙且慮兩
軍雜處或滋軋轢自不得不遞續前進近准四川督臣咨委解成
祿餉銀三萬兩赴秦州存候成祿委員提取而成祿委員尙無來
秦消息臣已飭兌撥川平銀三萬兩解存蘭州遇便搭解前進一
面咨成祿就近提取以歸捷便惟省城西路回亂以後大道久荒
驛站停撤緊要文報皆展轉積壓涼州限行文書遞到省城者每

在一月以後涼州以西更無論也見飭臬司設法整理以期漸復舊制又奏逆回自三甲集潰退後收集敗賊麇聚大東鄉口分踞甘坪大貝坪等處結壘負固各將領均以甘坪壘多且偏若悉銳埽除則大貝坪之氣自奪布政使王德榜道員朱明亮率親兵等營徑攻甘坪之西提督劉明燈率所部取道集下甲堡攻其北提督楊世俊張仲春率所部進八甲口攻其南提督徐文秀率所部牽制大貝坪之賊提督傅先宗常川列隊兼遏太子寺七家集援賊鈔襲之路於十二日整隊分進甘坪守賊出馬步萬餘屯據山梁土德榜揮軍仰攻於礮石交下之際冒險猱升旋躡旋登將及嶺巔賊悉力下壓朱明亮及總兵鄧榮佳等猛進立斃執旗賊目四名趁勢追殺躍壕攀堞連破賊壘四座劉明燈抵集下甲堡都司鍾鳴鳳率右營破堡前一卡鼓銳攻堡弁丁多受石傷劉明燈

急出正中營及左營從堡後繞入賊正不支鍾鳴鳳已大呼先登分隊衝殺徑抵甘坪楊世俊甫進入甲口適大東鄉之賊以另股來援揮軍禦之仍飭張仲春迅攻甘坪山南各下槍礮對轟參將周乾山等填壕進攻立破兩卡楊世俊亦將援賊擊退三路兜剿將甘坪堅壘十餘座悉數蕩平傅先宗遙見甘坪得手會同徐文秀攻大貝坪之南自率隊繞出其後賊知甘坪不守均棄壘狂奔各軍電掃風馳立將大貝坪張家坪張家灣各堡壘掃蕩無餘斃賊千計十三日詗知鮑家莊大坪等堡賊懼於兵威紛紛宵遁劉明燈等率隊躡剿連破堡壘十餘處十四日會剿大東鄉口前隊甫至守賊已望風披靡驅殺入谷見山溝紛錯料有伏賊畱已革副將敖天印副將尤成章各率所部紮谷口備援應各軍銜尾銳進搜賊二十餘里毀賊卡數座至陰窪泉地方突見伏賊全起層

層環偏官軍整隊衝殺賊愈戰愈增王德榜等各下馬督戰回目于海朝祖臂陷陣總兵沈玉遂手刀之士氣益奮敖天印聞槍礮聲急分隊循谷口衝入力砍守隘悍賊多名兩路遙合賊不能支均遁踞山脊官軍連環收隊而還十五日傅先宗復率隊踰溝而進節節掃蕩仍飭敖天印列隊後路以備策應行次紅莊立破賊壘數處賊分由兩山壓下官軍分剿之陣殲悍賊百餘名生擒逆目馬祖拜烈斬之餘賊駭退是日劉明燈率所部沿河西下先抵包家觜攻破其堡賊向太平堡狂奔又分兵破其下寨會攻太平堡太平堡憑巖俯瞰一徑繚繞官軍甫抵山腳賊發滾木插石從上墜下官軍於隙處鼓勇而登槍斃執旗布置之賊目一名弁丁蟻附登牆擒賊目馬行三斬以徇其奪門出者適朱明亮攻破竹影臺堡後縱兵截殺殲斃極多救出難民三百餘口劉明燈以包

家菁爲大東鄉出犯後路要隘遂畱營據之賊雖屢敗兇欲猶張
並喊撒拉逆回在董家山謝家坪等處築壘抗拒一面於紅莊一
帶增築堅壘一面分詣各統領營門乞撫並獻良馬二十二匹諸
將知其爲緩師計也限令數日內悉數呈繳馬匹槍礮許爲轉稟
大東鄉逆首馬悟真仍藉詞支展十一月初六日王德榜張仲春
率四營進紮李家臺白家莊逆首馬占鼐畏官軍追剿帶其黨夥
及撒拉回遁歸弁泥溝老巢王德榜等十三日進紮上七甲集大
東鄉援賊果紛紛而至徐文秀等嚴陣以待楊桂芳等以馬隊分
伏林中俾王德榜得壹意築壘追賊愈逼愈近分股擾及營後官
軍奮起擊之沈玉遂擣其中堅傅先宗在左徐文秀在右槍礮止
刀矛接馬隊由林中突出風馳電掣分鈔賊後賊不能成列沿河
狂遁其繞出營後者朱明亮以守營之軍橫出截之均敗走是役

斃賊一千餘名夜間調知七甲集之賊併入謝家坪十四日張仲春進據賊壘是日大雪楊世俊由臘脂山來同各將領登高瞭視見謝家坪一帶炊煙全起知賊麇聚此間意八甲口內果園紅莊八戶掌等處賊勢單薄機有可乘商同傅先宗徐文秀各率所部循八甲口攻紅莊各巢楊世俊王德榜所部取道趙家溝攻謝家坪十五日子刻傅先宗由八戶掌山下入溝銜枚疾走途獲賊諜知逆目周七十見踞紅莊卽飭王德勝趨紅莊之前提督彭國忠分扼山腰總兵張德勝攻其後大呼猛進賊倉卒不知所爲副將朱運廣由堡後踊躍而上手刃逆目周七十堡賊鼎沸餘壘見大堡火起悉數奔逃再擣果園馬隊分途鈔至立將各堡踏毀計陣亡哨官許得義四員徐文秀徑抵八戶掌之前以火彈拋入賊壘總兵郝守南鼓勇先登沈玉遂又破其後壘餘賊棄壘鼠竄王德

榜先至米家坪賊尙未覺立破四卡二壘趙家溝踞賊憑壘抗拒
弁勇齊施火器副將余起立冒煙衝入敗賊亂竄康家莊之賊亦
不戰自潰楊世俊飭張仲春攻小陳家坪自攻馬家坪立毀三壘
正分途追殺間康家莊敗匪突至復擊卻之於時王德榜徐文秀
會隊復攻謝家坪賊棄堡狂奔楊世俊列隊平川遇太子寺之援
朱明亮助攻董家山參將廖福景已破山腰一卡接攻次卡忽被
飛子貫顙殞命將弁憤甚立破其卡斃賊甚多然董家山一帶地
險賊眾究未能破也日暮收隊是日各軍共破大小堡壘五十餘
處殺賊不過數百名其帶傷竄遁者不知其數緣逆回見官軍勢
猛不敢戀戰前者抵格後者狂奔驀山越溝是其慣技又山徑皆
其熟遊易於避匿故耳是夜劉明燈調知沙泥對岸三十頂莊料
宅莊有賊竄伏急往截剿遇賊新店子頗有撿斬賊駭而奔人馬

踐水而過陷入深溜者甚多臣宗棠以董家山一帶山梁縣亘數十里西接太子寺北蔽大東鄉山巖高削大小壘林立非亟圖攻撲無以制賊賊且得俯瞰官軍飭按察使陳澍親往相度形勢會督諸軍力規進取陳澍旋同傅先宗楊世俊徐文秀劉明燈等商議董家山由西而東盡於洮岸東峻而西稍夷謝家坪一帶坡陀迤邐尙可攀登二十五日賊眾紛聚謝家坪正圖築壘官軍以開花礮轟之遂潰走二十六日傅先宗進紮朱家坪賊悉銳來爭官軍力卻之二十八日劉明燈陣於川中傅先宗楊世俊徐文秀三路並登賊據半山力拒官軍前隊鏖戰後隊卽就陣後築營更番疊進自辰至午楊世俊於朱家山成三營徐文秀於董家山腰成五營前隊且戰且進銳不可當賊敗走官軍躡蹤猛追連奪陳家山楊家山等處數卡斃賊數百復排隊窮追賊不及入壘壘中賊

亦相率翻山竄遁遂將董家山一帶大小賊壘一律奪取徐文秀分營據各大壘太子寺騎賊未之知也順川來援劉明燈擊卻之步賊仍列隊繼進提督陳廣發怒馬砍陣手斬其渠賊遂敗潰是役各軍殺賊千餘名內有僞總帥馬肥人等數十名生擒馬油緣布等數十名訊明軍前正法自此大東鄉太子寺路徑疏通可以直擣太子寺巨巢矣是夜有賊伏王家山溝莊圖阻官軍前進並潛襲各營高月桂訶知擊退斃白巾悍賊數十名十二月初一日各軍分道逐北至太子寺對山始收隊而還初二日傅先宗進攻新路坡五卡克之初三日楊世俊進紮四厚子徐文秀派營護其築壘壘成未半騎賊步賊紛紛來撲楊世俊揮軍擊退之連日楊世俊滾營進紮徐文秀等皆列隊護助太子寺爲河州總要關隘向設河州州判駐此以重形勢亂後爲河州逆回所踞漢民窮苦

無歸者依回過度名爲隨教雖尙存十之二三然皆地皆被回族佔奪久成異壤逆首馬占龍敗遁牢泥溝老巢後見官軍日偏復糾聚悍黨及撒拉循化各處悍回與大東鄉甯河逆賊圍聚太子寺環太子寺掘壕深約二丈餘闊倍之壘卡林立北與石納奴潘家火紅等回堡互相犄角力圖久抗官軍初七日五鼓楊世俊徐文秀等各率所部募食前進黎明分路猛撲鏖戰四時奪賊長壕並破山頭一壘楊世俊卽移一營據之賊未敢犯初八日陳湜楊世俊徐文秀劉明燈等各派隊分攻太子寺北大紅莊等賊堡因山高徑仄不能列隊堡賊槍礮飛石雨注相持數時援賊麇集乃一面撤隊一面接戰斃賊數百而還傅先宗列隊南山頂直擣賊巢楊世俊徐文秀各率所部分兩路從東面上山前及山腰悍賊萬餘蠡擁來撲楊世俊徐文秀揮所部整列迎戰槍礮止刀矛接

賊眾死傷相繼一悍目騎馬持刀斷後勒羣賊反鬪屢卻屢前刀
矛擊戛有聲如是者十數次鏖戰四時楊世俊揮所部衝入賊陣
斬此賊於馬下賊乃大敗官軍兩路壓剿殺斃槍斃及墜巖墜斃
者約千餘計亦可謂惡戰矣生擒悍賊馬哈思訊知悍目馬有阿
渾乃馬占鼇手下領員大東鄉人陣前斬兩騎賊一爲馬麻五是
六阿渾手下領員一則六阿渾之子也是日白巾悍回及撒拉回
死者以數百計傳先宗一軍亦頗有擒斬又奏化平川撫定陝回
陳林閻與春等二十餘名以竄踞西甯陝回崔三等哀懇具保投
誠並央其呈遞稟詞臣察看情形尙屬真切准陳林閻與春等前
往察辦並面示一切陳林等於十一月初八日抵西甯始知崔三
已帶其黨夥數千九月內由扁都口一帶出竄肅州口稱因肅回
謀殺投誠陝回馮均幅欲向其講理尙未歸巢陳林等比至大南

川一帶察看情形見陝回老幼婦女約數千戶所言皆同聞陳林等至無不喜其來而恨其晚也陳林等因崔三等未歸無從議撫急欲言旋該眷口等泣請暫畱恐此機一失後無路乞撫各眷屬皆願僱人赴肅送信要崔三等迅速回巢陳林遂回西甯將一切情形兩次稟知道員馮邦棟轉稟前來頃又准豫師平番來函言西甯撫局自陳林到後同情信服踴躍與往年大不相同代理西甯府知府馬桂源本回紳也請帶西甯諸回自赴平番聽撫陳林又諭知河州見存陝回勿復助逆至崔三何日返巢尙未接據稟報臣維西甯大局自已故青海大臣玉通被回脅制一意主撫媚回愈辦愈壞至今漢番僧俗言及無不痛恨切齒見據各寺番僧及士民來臣營具稟細詢一切知西甯實已名存實亡此次西甯及咪喇逆回所以急於就撫者因大軍方勘河州恐將移軍指湟

豫爲地步犬羊之性知畏威不知懷德此時稍涉遷就轉瞬仍肇
衅端不如豫定受撫款目觀其能否遵照再行酌奪已與豫師緘
商尙未准其覆到至崔三眷屬仍在小南川其必返巢無疑應剿
應撫容俟屆時察看情形妥爲辦理又奏大軍偪攻太子寺賊壘
後逆首馬占鰲馬悟眞等被剿情急糾聚悍黨增築二十餘壘加
掘長壕希圖穩抗一面嗾令大東鄉甯河及岷洮各回分繞後路
截掠糧運車馱牽制官軍以緩前敵之攻大東鄉一帶在洮西岸
濱洮迤西周百餘里山谷雜還皆回巢也臣原擬以徐占彪一軍
由靖遠取道金縣駐洮河東岸扼其津要迨肅州一帶急需准備
臣遵旨調徐占彪全軍前往而洮河東岸一帶無營可撥咨商穆
圖善派營駐紮穆圖善亦以無營可撥勉調甯夏鎮總兵李佑清
所部三營進紮柳林溝然自康家巖以下沙泥站古城一帶百餘

里仍屬空虛大東鄉賊時以零騎渡洮出擾雖均經會甯安定金縣護運各軍營隨時擊退究未能悉數殲除迨十月杪洮河漸次合凍康家巖下游冰橋先結人馬如履平地賊每喉大東鄉悍賊踏冰越古城沙泥站一帶乘閒伺劫糧運經護送各營竭力防範幸免損失惟十二月十三日三甲集回空馱騾四百餘頭經過新田鋪概被回逆搶去比劉明燈徐文秀在營聞警追捕賊已遠颺僅奪三十餘頭而還十七日回空馱騾七百餘頭行至距康家巖百餘里之站灘楊四川等處忽遇逆回馬步三千餘驟從各山溝衝出圍搶雖經站灘防營總兵蕭賞謙戴定邦等救護回營僅遺失三十餘頭斃賊百餘名帶傷者甚夥而蕭賞謙所部將弁勇丁力戰陣亡者四十七名戴定邦所部陣亡者九十餘名受傷者亦數十名比臣由營派親兵馬步馳往援剿賊已遁由沙泥一帶歸

巢矣臣維東路空虛賊之乘機出掠木在意中況當洮河合凍時處處皆成坦道防不勝防而前敵軍糧緊要勢難責其派隊領運應急增護運之軍以重餉道而臣大營親兵派去前敵者已一千有奇存營不過千餘尙須分隊巡哨護送蘭州及內官營一帶軍裝軍餉實屬不敷分布前奉諭旨曹克忠接統淮軍前赴肅州一帶須由蘭州經過如屆時河州尙未攻克卽著該提督會商穆圖善或將所部分紮省城附近各隘騰出穆圖善之兵前往省外各要隘分布似於防剿兩有裨益欽此謹遵諭旨咨商曹克忠先撥十數營赴蘭州由省南阿千鎮延紮沙泥一帶扼此要津如能及冰凍未泮之先橫擣大東鄉尤可出奇制勝但淮軍新舊交替之際整理需時是否能迅赴戎機未可豫料見又檄飭金積堡防軍提督蕭章開派提督譚拔萃帶湘勇二營及董福祥等三營取道

中衛靖遠會甯前來總兵張福齊帶所部兩營兩旗總兵徐萬福一營取道涇州慶陽前來均於安定取齊聽調緣各軍以在防無事屢請前來助剿也臣俟各軍營到齊當卽妥爲布置上諭軍機大臣等左宗棠奏官軍連破賊壘偏攻太子寺獲勝仍著督飭各營趁此春融冰泮之時奮勉圖功迅將太子寺等處賊巢攻拔節節掃蕩盡殄逆氛以期肅清甘境徐占彪抵甘州後擬以兩營先赴高臺俟糧運辦就卽調黃虎臣等駐涼五營接續前進著左宗棠檄令蕭宗幹迅將購糧轉運事宜妥爲籌辦以利師行高臺地方徐占彪已先撥兩營填紮此軍一到成祿卽當督率所部剋期出關不准稍涉遲緩四川委解成祿餉銀三萬兩左宗棠見已兌解蘭州遇便搭解著成祿派員就近提取以資應用由省至肅州一帶郵政廢弛並著檄飭臬司設法整頓庶文報往來不至積

歷另片奏赦天印疊著戰功請予恩施等語所有該革員屬般孫之友一案著免其解豫歸案審辦卽由左宗棠咨明豫省遵照辦理將此由六百里各諭令知之○左宗棠奏河州迤西之西南北三面與循化廳洮州廳岷州三屬番界毗連縣亘數百里其槐樹土門老鴉三關距牟泥溝一帶賊巢尤近舊爲番族所居史所稱枹罕羌人者也番眾僧俗各隸於土司生長巖穴之間性頗樸野善使火槍地素產馬人習乘騎洮州土司楊元者宋名將楊業後裔也自逆回肇衅以來卽從征調戰績卓然惟番部不習紀律又秉性愚直不敵回之狡猾故易爲賊所乘戰鬪頻年人畜傷亡過半銳氣亦稍衰矣臣度隴之初加意撫循遴員署沅州廳同知岷州知州宣布皇仁結以恩信諸番轉相傳說多感激思奮者茲據署洮州廳同知陳臺等會稟督同土司楊元自洮屬姜卡寺入

番界歷黑錯而買務而卡加而童艾而多格寺而俄化所至之處
諭以練團捍衛各保身家番眾雖語言不通一經略能漢語者爲
之譯說無不悅服歡舞比由番族自議土門關以拉布浪童艾兒
火力藏各族守之槐樹關以卡加各族守之沙馬關以黑錯各族
守之陡石關以買務各族守之新城堡以楊元所部丁永安所部
守之其撒拉回巢之西爲下庵綽上庵綽卜拉敦化各族去各關
隘最遠亦經胥土司趙僧綱等先後調到各野番爲各關隘策應
經陳臺等諭以朝廷威德莫不膜拜歡呼譯者云自來未見官吏
蒞境也點驗先後調到番眾僧俗四千餘人騎馬四千餘匹一律
頒賞官茶紅綠布銀牌番眾感悅願聽徵調臣飭提督楊世俊統
之令其各防本境另聽調遣察看情形似河回錠走番境一著尙
有以待之得旨覽奏已悉仍著檄飭楊世俊及該地方文武妥爲

駕馭令該土司等各防本境毋稍疏虞○乙未予甘肅陣亡知縣
廣年祭葬世職○戊戌諭軍機大臣等左宗棠穆圖善奏各路兵
勇疊次擊賊獲勝穆圖善奏親督官兵截剿竄擾北山回匪各一
摺上年冬間甘省東西北三路馬步兵勇先後截擊竄匪屢獲勝
仗其竄擾北山一帶賊匪經穆圖善親督官軍兜剿斃賊多名見
在大軍進擣河州賊勢窮蹙難保不鋌而走險擾及省垣以圖牽
掣左宗棠穆圖善分飭各軍扼要嚴防毋任該逆陸續出竄以期
擒渠堵穴聚而殲旃其西路爲運道所關北山秦莊川一帶產糧
最多均應設法保護該大臣務當嚴飭將弁勤加偵探認真防守
遇有賊匪竄近卽行實力擊剿毋稍疏虞將此由五百里各諭令
知之○庚子諭軍機大臣等劉嶽昭岑毓英奏派軍出境剿辦威
甯州積匪全數撲滅餉道肅清一摺積匪楊紹瀆等盤踞黔省威

甯州地方經劉嶽昭等派委吳奇忠等會同該省文武分投剿辦
擒獲楊紹濱陳大桿平毀賊巢惟威甯州地方爲滇省餉道關繫
緊要匪首李黑四先期潛逃誠恐糾合餘燼蔓延爲患仍著嚴飭
在事文武實力偵緝務期淨絕根株毋畱餘孽並著知照曾璧光
督飭地方官將善後事宜妥爲辦理一面會拏逃匪不得任令遠
颺將此由五百里各諭令知之○諭曾璧光奏克復清平等城一
摺黔省清平黃平一帶爲苗匪麇集之所賊巢林立驛路中梗見
經曾璧光等派兵進剿將清平黃平重安等城克復驛路業已疏
通正宜乘此聲威掃蕩苗疆殲除羣醜著分檄鍾有思等將敗殘
餘匪盡數撲滅毋令蔓延清黃重安一路漸就肅清楚省援黔之
軍進攻黃飄白堡聲勢可期聯絡並著該撫等檄飭各營趁此事
機得手之時約會楚軍通力合作以竟全功不得稍涉鬆勁將此

由五百里諭知曾璧光並傳諭周達武知之○辛丑諭軍機大臣等王文韶奏援黔各軍攻克黃飄白堡苗寨疏通驛路會合黔軍進剿一摺貴州苗匪聚集黃飄白堡一帶經湖南援軍節節進剿賊寨悉平驛路業已疏通湘黔各軍會合辦理更形得手昨據曾璧光等奏黔軍克復清平黃平重安等城乘勝進剿等語見在湖南援軍復將黃飄等處攻克正可聯絡聲勢迅掃逆氛著曾璧光檄飭各營乘此軍威會合楚軍剿洗而前盡殲醜類北岸賊匪業經掃除該處善後事宜著曾璧光飭令地方文武妥爲經理南岸官軍連破苗寨所有招撫降苗一節著王文韶飭令戈鑑安慎籌辦不得稍有疏虞唐本有等軍剋日南渡從直涌地五寶項節節按剿一俟黔軍進至兩岔河香鑪山一帶卽著會同攻剿該撫等當趁此事機得手之時督飭各軍通力合作以竟全功毋稍鬆勁

將此由五百里諭知曾璧光並傳諭周達武王文韶知之○予貴州陣亡副將李能壽等祭葬世職○免福建運津濟賑米船釐稅

○癸卯以譚鍾麟暫護陝西巡撫

由布政使護理

○甲辰諭軍機大臣等

劉坤一奏匪徒撲入靖安縣城當經擊散請將疏防各員褫革一摺江西奉新縣匪徒於上年十二月間糾眾百餘人闖入靖安縣城擄搶燒毀縣署雖經代理縣丞魏鑫等會同奉新縣知縣汪以誠調集鄉團合擊陣斬匪首吳沅發等生擒溫開接等多名匪黨均已擊散惟此股匪徒爲數並不甚多而該縣知縣陶黼昌及縣丞高節先事未能籌防均屬咎有應得陶黼昌高節著一併革職仍著劉坤一查明該員等有无退避情事據實參奏該撫見派副將普承忠馳往剿辦卽著督飭該副將會同各該地方員弁實力搜捕餘匪務絕根株毋任一名漏網在事出力員弁團紳著准其

擇尤酌保毋許冒濫將此由四百里諭令知之○乙巳湖南瀏陽縣土匪滋事官軍剿平之○辛亥諭內閣兵部左侍郎崇厚著在總理各國事務衙門行走太常寺少卿總理各國事務衙門章京夏家鎬著在該衙門大臣上行走○壬子諭軍機大臣等景廉奏覆陳籌畫西進事宜一摺景廉馳抵巴里坤後探悉趙興體等民團尙知大義特恐該營糧餉缺乏見異思遷已派員赴西路一帶撫慰各營分別給予銀物所辦甚是惟當隨時駕馭拊循俾趙興體孔才等營始終固結不至渙散以助聲威軍糧採辦惟艱前據景廉奏請已諭李鴻章等分飭口北歸綏兩道廣爲採辦並諭金順等籌辦轉運事宜以備征兵之用巴城採買糧石尙未交齊著伊勒屯隨時督催毋稍膜視將來大兵雲集需糧尤多並著景廉會商伊勒屯豫爲籌畫以資接濟景廉帶兵西進餉需甚急所有

應解哈密餉銀及該都統請撥之山東糧價山西專餉部餉等款
仍著文麟照前分撥三分之一以應要需見在春氣漸融前畱哈
密兩營及靖邊前營正可拔隊啟行著景廉催提前進毋任逗畱
一俟各營到巴卽著陸續西進迅赴戎機並著常順保英迅卽採
買駝牛羊隻委員解赴巴城交景廉軍營應用以利師行將此由
六百里各諭令知之○甲寅于安徽陣亡副將蔡應龍原籍建祠
○是月豁免湖北黃陂等五縣被擾積欠額賦蠲緩兩浙鮑郎等
六場被災新舊竈課緩徵直隸景州等八十七州縣被水新舊額
賦租課並民借倉穀山東濟甯等四十六州縣青州等五衛被水
被旱被蟲本年上忙額賦雜課江西蓮花等二十六廳縣九江等
二衛被旱被水新舊額賦

二月丙辰允鮑源深奏暫畱張樹聲辦理山西計典以恩錫畧漕

運總督○丁巳欽奉 慈安皇太后 慈禧皇太后懿旨皇帝沖

齡踐阼於今十有一年允宜擇賢作配正位中宮以輔君德而襄
內治茲選得翰林院侍講崇綺之女阿魯特氏淑慎端莊著立爲
皇后特諭○奉 懿旨皇帝大婚禮著欽天監諏吉於本年九

月舉行所有納采大徵及一切事宜著派恭親王奕訢戶部尙書
寶鋆會同各該衙門詳覈典章敬謹辦理○奉 懿旨員外郎鳳

秀之女富察氏著封爲慧妃知府崇齡之女赫舍哩氏著封爲瑜
嬪前任副都統賽尙阿之女阿魯特氏著封爲珣嬪○命曹克忠
統兵赴肅州會剿趣成祿出關○調吉林黑龍江馬隊各五百名
赴成祿軍營○壬戌諭軍機大臣等榮全奏行抵塔爾巴哈台暫
安行營一摺榮全自霍博克賽里前進已於上年十二月十一日
行抵塔爾巴哈台隨行官兵冒雪衝寒不辭艱險甚屬可嘉該署

將軍見在塔城附近暫立行營該處地方殘破其舊居之哈薩克人眾既尙恭順自當妥爲拊循俾知感奮伊犁近日情形若何俄官喀爾帕柯斯克依約在何地會議著榮全酌度機宜悉心籌辦並將會議時俄官如何情形及如何措詞隨時詳晰奏聞葦塘子附近既有俄人在彼紮營該處向有索倫人眾並著榮全設法曉諭以固人心而資聯絡將此由六百里諭令知之○允吳棠奏撥釐金銀二十萬兩賑四川災民並免湖廣等省沿途各關卡商販米釐○乙丑諭軍機大臣等張廷岳等奏竄匪出邊肆擾妥籌防剿一摺西路逆匪二千餘人已於正月間竄至阿畢爾米特遊牧西南濟爾哈朗圖地方沿途擄掠該逆傾巢出擾勢甚披猖難保不伺隙紛乘牽我兵力邊外地方遼闊無險可扼亟思妥籌防剿免致蔓延且據探稱索倫賊首意圖報復有欲帶賊二萬餘分犯

烏科庫倫之說尤宜先事圖維著金順奎昌多布沁札木楚常順保英張廷岳阿爾塔什達勤加偵探協力防範遇有賊股竄近卽行痛加剿洗力遏狂氛賽爾烏蘇一帶臺站爲糧餉往來要路該處距庫倫較遠張廷岳等兵力甚單未能兼顧著杜嘎爾迅派得力將領選帶馬隊馳赴賽爾烏蘇一帶擇要扼紮嚴密堵截毋任賊匪竄擾並著金順奎昌多布沁札木楚額勒和布各將所屬臺站布置周密設法保護以期有備無患賊匪如竄近庫倫卽著張廷岳帶兵前往迎剿毋任竄入將此由六百里各諭令知之○丙寅諭內閣大學士兩江總督曾國藩學問純粹器識宏深秉性忠誠持躬清正由翰林蒙 宣宗成皇帝特達之知洊升卿貳咸豐年間冊立楚軍剿辦粵匪轉戰數省疊著勳勞 文宗顯皇帝優加擢用補授兩江總督命爲欽差大臣督辦軍務朕御極後簡任

綸扉深資倚任東南底定厥功最多江甯之捷特加恩賞給一等
毅勇侯世襲罔替並賞戴雙眼花翎歷任兼圻於地方利病盡心
籌畫老成碩望實爲股肱心膂之臣方冀克享遐齡長承恩眷茲
聞溘逝震悼良深曾國藩著追贈太傅照大學士例賜卹賞銀三
千兩治喪由江甯藩庫給發賜祭一壇派穆騰阿前往致祭加恩
予諡文正入祀京師昭忠祠賢良祠並於湖南原籍江甯省城建
立專祠其生平政蹟事實宣付史館任內一切處分悉予開復應
得卹典該衙門察例具奏靈柩回籍時著沿途地方官妥爲照料
其一等侯爵卽著伊子曾紀澤承襲無庸帶領引見其餘子孫幾
人著何璟查明具奏候旨施恩用示篤念忠良至意○以何璟署
兩江總督恩錫署江蘇巡撫文彬署漕運總督

由山東布政使署

○戊辰

諭軍機大臣等河州賊悍巢堅地勢險峻疊經諭令左宗棠督率

各軍穩慎進取日久未據該督奏報廬繫殊深近聞官軍進攻新路坡迤東賊卡未能得手傷亡多人統領大員有臨陣捐軀者有不知下落者見在各營退屯高家集一帶堅壁扼守帳房軍裝等件多有遺失勇丁亦有逃亡而自狄道至鞏昌運道仍是梗阻此等情形如果屬實則賊勢復張兵威頓挫而糧餉又不能繼後患殊不可言左宗棠規畫河州圖維已久當此事機緊迫應如何整頓戰守疏通糧道之處想必悉心籌畫以作士氣而固軍心一切辦理情形卽著迅速奏聞甯靈一帶需兵鎮壓見分紮若干營張曜一軍向稱得力尙駐甯夏等處若左宗棠前敵亟需添兵就近調張曜之兵會剿足壯軍威著左宗棠斟酌全局妥爲辦理前據該大臣奏劉錦棠請假六箇月回籍卽令募勇來營等語刻下該員假期已滿卽著左宗棠檄催到甘派赴前敵以資得力將此由

六百里諭令知之○諭左宗棠穆圖善奏各路兵勇剿賊獲勝一摺甘肅附省駐紮各營疊在古浪平番永昌金縣地界截剿竄匪獲勝糧運得以無虞見當進剿河州喫緊之時仍恐該逆伺隙紛乘希圖牽掣近省東西北三路爲運解糧餉軍火往來要道亟應加意嚴防著左宗棠穆圖善飭令各營嚴密偵探認真扼守遇有賊股出竄卽行分投雕剿力遏狂氛以靖地方而護運道毋得稍有疏虞致滋延蔓將此由五百里各諭令知之○諭兵部奏遵議提督劉銘傳處分一摺前任直隸提督劉銘傳移交所部兵勇辦理乖方經兵部議以革職並請將所兼一等男爵革退本屬咎有應得姑念該提督從前勦匪出力著照部議卽行革職加恩仍畱一等男爵以示薄懲○以署兩江總督何璟兼署辦理通商事務大臣○已巳欽奉慈安皇太后 慈禧皇太后懿旨欽天監奏選

擇大婚納采大徵吉期各摺皇帝大婚典禮著於本年九月十五日舉行七月二十六日納采八月十七日大徵所有應行事宜著各該衙門敬謹辦理○允左宗棠奏添建甘肅涇州考棚○庚午諭軍機大臣等杜嘎爾奏賊匪肆竄派隊迎剿等語據奏賊匪於正月初間竄由蘇哈圖向東北奔逸阿畢爾米特遊牧濟爾哈朗圖山陽地方有賊股蠡擁竄擾與張廷岳等前奏大略相同該逆傾巢出擾亟應乘其喘息未定迎頭截擊痛加剿洗免致日久蔓延杜嘎爾見派貢果爾帶隊前往迎剿並令富珠哩永德等合力夾擊卽著檄令該將領等星速馳剿務將賊匪一鼓撲滅毋稍玩延該匪既有欲竄庫倫之說張廷岳等當懷遵前旨勤加偵探如有匪蹤竄近卽行帶兵截剿毋任竄入該城防守事宜並著張廷岳阿爾塔什達會商妥籌布置不得以賊蹤尙遠稍涉大意賽爾

烏蘇一帶杜嘎爾仍當派隊扼紮以衛運道杜嘎爾另摺奏請由察哈爾營總那本濟勒色楞管帶隊內挑補第五隊缺額等語卽著額和布按照杜嘎爾所咨缺額數目挑補以資得力將此由五百里各諭令知之○詔起彭玉麟巡閱長江水師○辛未諭軍機大臣等曹克忠奏派兵扼防陝邊情形一摺據稱正月間甘省回逆分竄徽縣兩當等處陝防喫緊當派馬步各營馳赴鳳縣寶雞等處扼紮見在賊氛漸遠已將耆貴一軍撤回乾州仍畱徐邦道馬隊移紮鳳郡等語刻下陝防旣鬆肅州軍務緊要河州賊勢又肆狡猾曹克忠所部各營自當速籌整理拔隊西進該提督以糧運車贏異常竭蹶惟恃李鴻章撥款解到方可辦理並據聲稱屢接李鴻章來函深知西路糧運艱難將於正餉外多措協餉貼補運費等語足見該督圖維周至力顧大局卽著李鴻章將該軍所

需餉項寬爲籌畫迅速撥解俾利軍行曹克忠亦當趕緊部署啟程毋稍延緩將此由四百里諭知李鴻章並傳諭曹克忠知之○壬申諭軍機大臣等前據穆騰阿等並梅啟照同日奏到曾國藩因病出缺當經降旨優予卹典並於湖南原籍江甯省城建立專祠生平政蹟事實宣付史館一等侯爵卽著伊子曾紀澤承襲其餘子孫幾人令何璟查明具奏候旨施恩茲據何璟歷陳曾國藩公忠體國懋著賢勞覽奏尤增悼惜何璟原摺著暫行畱中卽將該故督之孫何名年歲若干查明具奏再降諭旨兩江總督及通商大臣事務已先後降旨令何璟署理該署督膺茲重寄所有江防海防暨鹽汀漕諸大政亟應循照舊章悉心布置並講求吏治民生妥辦中外交涉事件用副委任將此由四百里諭令知之○癸酉諭軍機大臣等綿宜奏根本重地馬賊日熾積久恐成巨患

一摺盛京爲根本重地豈容馬賊成羣肆行劫掠前因有人奏奉天承德縣等處盜賊充斥曾諭令東三省將軍實力接捕茲覽綿宜陳奏各情是馬賊滋事之案層見疊出若不及早捕治必致滋蔓難圖該侍郎所擬清盜源除賊首整兵力嚴門禁四條均屬妥協著都興阿瑞聯清凱恭鏜妥速籌商嚴定章程嗣後拏獲馬賊卽將賊之父兄從重治罪庶父子相維弟兄交儆或可收改惡從善之效至各堡保甲應如何認真整頓旗界民界各官應如何嚴予責成毋令置身事外之處並著該將軍府尹妥籌辦理新出馬賊尙易破獲老賊則交通胥役廣有聲援轉得漏網地方文武官弁玩弛至此實堪痛恨此後務將著名盜首嚴行緝捕如有胥役包庇縱放卽將該役嚴辦並將該管官嚴參以示懲儆營兵之設以資捍衛尤當督飭該管各官嚴明賞罰隨時跟緝其假冒兵役

客商者尤當卽時掩捕盡絕根株至奉省八門該將軍等當飭城防各吏認真盤查毋使奸宄溷迹出入以遏亂萌此次誥誡諄諄該將軍府尹等務當振刷精神趕緊籌辦儻敢因循粉飾視爲具文以致盜賊蔓延必爲該將軍等是問原摺著鈔給閱看將此各諭令知之尋都興阿等奏奉省盜匪厯經嚴拏懲辦見將前辦章程再行責成內外城旗民地方官實力奉行得旨仍著該將軍等認真辦理毋得有名無實以致盜賊蔓延自壬寅○丙子諭軍機大臣等李鴻章奏籌運巴里坤軍糧請嗣後改辦粟米一摺巴里坤糧石已據該督飭令口北道採辦白麪十萬斤於本年二月間全數運送出口赴烏里雅蘇台接收轉運惟張家口距巴里坤等處計程萬里麪質潮溼誠恐遠道徽變所請嗣後或由景廉就地屯墾招買如必須張家口辦運應改購粟米以免潮變等語自

係爲慎重軍食起見著景廉體察情形查明該處兵糧確數將口北歸綏兩道各應辦運若干豫爲籌定隨時知照李鴻章鮑源深轉飭覈辦直隸所需米價腳費卽照李鴻章所請由口北糧臺領到部餉項下動支彙案造報將此由五百里各諭令知之○己卯諭軍機大臣等劉長佑馮子材奏官軍疊克賊巢殄除瓊武股匪並拏獲匪目出力各員請獎各摺片越南匪徒自官軍攻克從化買市後分股遁踞潯瀝等處經馮子材派隊分剿次第收復並將逆首何三等拏獲正法匪黨悉數殲除卽著劉長佑馮子材飭令陳朝綱迅速進兵務將逃匪張侍灝等盡力兜拏毋任漏網以清東路並飭劉玉成陳得貴兩軍將太原零匪會同剿洗毋稍遲延此次出力各員准其擇尤保奏毋許冒濫越南剿匪事竣該撫等懍遵前旨迅將前敵各軍凱撤入關扼要防守以固邊圉而靖藩

服將此由四百里各諭令知之○庚辰以辦理大婚典禮諭各省添撥京餉銀一百萬兩○允榮全奏伊犁各城官員廉俸均予八成實銀兵餉概免減成○辛巳諭軍機大臣等劉嶽昭岑毓英奏官軍攻破賊踞館驛外垣克復田心等處殲除逆首暨迤西官軍圍攻永平等城獲勝各摺片館驛田心等處久爲賊踞岑毓英督飭何秀林張保和等分路進攻力破館驛西北兩門田心等處賊巢同時攻破擒斬賊目多名逆首馬侍得業經焚斃該撫於餉需支絀之際督飭營弁兵勇屢拔堅巢剿辦甚爲得手仍著劉嶽昭岑毓英激勵各營乘此聲威迅將館驛全城克復曰者鄉婁兮等處賊眾被剿窮蹙並著乘勢一鼓蕩平肅清各處匪巢以靖邊圉此次出力各員准由該督撫於館驛全城克復後擇尤保獎候旨施恩迤西軍務並著分飭楊玉科李維述迅將永平雲南等縣

城剋日攻拔規取大理盡殄逆氛將此由六百里各諭令知之○
壬午裁浙江水陸各營都司守備各一千總等弁四十改設都司
守備各二對調都司守備各一添設把總一○癸未諭軍機大臣
等譚鍾麟奏籌辦陝省邊防並探聞甘省軍情各摺片據稱甘肅
兩當徽縣均有零股回逆竄擾調李輝武所部由略陽鳳縣出境
扼紮遣撤王名泊略武四營由李輝武另募六營分別布置並畱
譚仁芳所部四營駐守隴竇均著照所擬辦理該護撫仍當飭令
李輝武等勤加偵探嚴密堵剿毋任賊蹤擾及陝境邵亨豫計可
抵任並著將陝省防剿事宜妥爲籌備以固疆圉前聞甘省官軍
進攻新路坡賊卡傷亡多人各軍退屯高家集並聞提督傅先宗
中礮陣亡似此情形賊勢頗爲猖獗日久未據左宗棠奏報殊深
廑繫茲據譚鍾麟奏探聞西甯河州兩處回酋先後赴安定大營

投誠願繳槍礮馬匹等語回匪詭譎性成每當攻剿喫緊時以投誠爲緩兵之計刻下該逆是否真心悔罪左宗棠務當體察情形妥慎籌辦不可稍涉大意致爲所紿其各處要隘仍須分派各軍加意堵遏以防乘閒紛竄後路運道見在有無梗阻並近日前敵軍情若何著卽迅速奏聞曹克忠所需募勇經費前據李鴻章奏已飭後路糧臺搭解赴陝該提督卽當懷遵前旨速籌整理拔隊西進毋稍遷延將此由五百里諭知左宗棠邵亨豫並傳諭譚鍾麟曹克忠知之○以馬恩溥爲內閣學士

由詹事遷

○甲申諭內閣丁

寶楨奏堵築侯家林決口見已合龍一摺山東侯家林決口經丁寶楨親赴工次督率布政使文彬等嚴飭在工各員弁陸續進占南北兩壩於本月二十四日合龍工程一律堅實覽奏實深欣慰丁寶楨勇於任事督率有方未及兩月克竟全功辦理實爲安速

著交部從優議敘另片奏請將出力守備獎勵等語前任東河守備劉秦挑挖引河節費省夫成功迅速著賞換花翎並賞銀五百兩以示優異又片奏此次工程請免照例報銷等語東省鄆城地方舊未設有廳汛辦理河工亦無成案可循此次工程用款著開單奏明咨部存案免其按照成例報部覈銷他處工程有案可循者不得援以爲例○諭軍機大臣等前因內閣學士宋晉奏製造輪船糜費太重請暫行停止當諭文煜王凱奏斟酌情形奏明辦理茲據奏閩省製造輪船原議製造十六號定以鐵廠開工之日立限五年經費不逾三百萬兩見計先後造成下水者六號具報開工者三號其撥解經費截至上年十二月止已撥過正款銀三百十五萬兩另解過養船經費銀二十五萬兩用款已較原估有增造成各號輪船雖均靈捷較之外洋兵船尙多不及其第七八

號船隻計本年夏間方克蒞工第九號出洋尙無準期應否卽將輪船局暫行停止請旨遵行等語左宗棠前議舨造輪船用意深遠惟造未及半用數已過原估且禦侮仍無把握其未成之船三號續需經費尙多當此用款支絀之時暫行停止固節省帑金之一道惟天下事舨始甚難卽裁撤亦不可草率從事且當時設局意主自強此時所造輪船旣據奏稱較之外洋兵船尙多不及自應力求制勝之法若遽從節用起見恐失當日經營締造之苦心著李鴻章左宗棠沈葆楨通盤籌畫見在究竟應否裁撤或不能卽行裁撤並將局內浮費如何減省以節經費輪船如何製造方可以禦外侮各節悉心酌議具奏如船局暫可停止左宗棠原議五年限內應給洋員洋匠辛工並回國盤費加獎銀兩及定買外洋物料勢難退回應給價值者卽著會商文煜王凱泰酌量籌撥

該局除輪船外洋槍洋礮火藥等件是否尙須製造及船廠裁撤後局中機器物料應如何安置存儲之處並著妥籌辦理已經造成船隻文煜等以撥給殷商駕駛殊爲可惜擬將洋稅一款仍作爲養船經費酌留兩號出洋訓練卽著照所議辦理其餘各船俟各省咨調時分別派往將此由五百里各密諭知之○兩廣總督瑞麟奏訊明越南匪首蘇桐漢等正法得旨仍著嚴拏蘇亞鄧並將逃竄餘匪悉數拏獲以絕根株○是月蠲免直隸安州等八州縣積澇地畝上年額賦並緩節年民欠糧租減免雲南東川等四十四府廳州縣被水上年額賦蠲緩廣西橫州等二十九州縣被擾新舊額賦

三月乙酉朔諭軍機大臣等曾璧光奏剿辦上游回匪肅清安南克復貞豐進規興郡新城一摺貞豐州城旣克上游軍事正順亟

應乘勝進攻晉壁光見派吳德溥等帶隊馳赴興義著卽飭令督同該處文武相機勦辦力攻興義府及新城等處迅圖克復惟該處回夷各匪皆百戰死黨且地接滇疆尤恐此擊彼竄蔓延爲患著劉嶽昭岑毓英挑派得力大員管帶兵練迅卽馳赴該處會同合力勦辦迅掃逆氛將此由六百里諭知劉嶽昭岑毓英曾壁光並傳諭周達武知之○諭劉長佑馮子材奏攻勦越匪海太肅清一摺海陽太原肅清劉長佑等見將各營調回扼要防守卽著妥爲布置慎固封守以靖疆圉山宣興化餘匪已知照越南自行攻勦遇有緩急仍當遙爲聲援以示體恤藩服之意未可以距邊較遠概從膜視太轄沿邊一帶夷匪不時出沒劉玉成等所部暫畱太轄扼守各隘卽著飭令該員等認真防範務臻周密並約束兵勇毋許滋擾地方俟越南接戍兵到卽行撤回將此由五百里各

諭令知之○丙戌左宗棠奏提督楊世俊等於上臘石坡梁大捷後乘勝銳進奪其外壕該逆又於寨外加濬深壕二道並以重利要結撒拉循化八工米拉碾伯各痞回及四鄉悍賊拚死抗拒除分股繞襲運道外南由瓦房山舟豆以迄塌馬池北由火兒混堡循河而下折抵黑山之尾築壘六七十座遙圍以斷官軍狄道糧路二十三日又乘夜在黨川鋪北築二壘橫亘甘南建字兩營之間糧運復梗二十四日楊世俊傳先宗抽隊合擊遊擊石補天拔蚤先登各部繼進立將兩壘攻拔守賊殲焉傳先宗飭總兵李占椿分哨填紮旋報賊犯石坡梁各壘楊世俊收隊回援詎悍股緣澗突出徑撲填紮之壘李占椿憑壘堵禦中礮而殞遊擊何建威亦赴援受傷兩壘復爲賊據二十五日賊分撲石坡梁各營提督張仲春率隊要截擒斬多名二十六日賊傾巢大至南踰長壕北

踞河川東及宗岳各營之後分股圍攻薛家坪平西等營楊世俊
密飭各營堅守勿出賊勢漸懈張仲春督所部衝出楊世俊繼之
各營均開壁夾攻縱橫盪決賊死傷枕藉川中逋賊於履冰時自
相踐踏在坪上者強半迫墮深崖生擒馬老虎馬禿子馬格立等
九名斬之惟總兵易全雄戰沒兵勇亦有傷亡二十六日賊又大
至專攻石坡梁及薛家坪營盤拔柵填壕抵死不退張仲春率隊
來援川中另股截出接戰楊世俊督軍猛進身受兩傷裹創力戰
賊始反奔各軍乘之賊墜巖死者尤眾生擒米一麻木馬兆沅等
四名供稱二十六日之戰撒拉大頭目馬鄉老爲官軍陣斬黨川
鋪賊壘乃也阿渾挑悍黨死守以梗糧運者訊畢斬之是役總兵
張得志遊擊陳有祥董金成都司洪明泰守備韓鳳鳴主簿楊興
藻均血戰而殞二十八日天未明賊由四山鈔至楊世俊豫約傅

先宗各以五成隊迎戰分三路齊上槍礮止刀矛接官軍愈戰愈奮賊敗而走追殺百餘名陣亡都司王照益把總陳佩麟二員時各營乏糧宰馬爲食士氣仍壯臬司陳湜商派提督徐文秀劉明燈及臣宗棠親兵各哨各率所部裹糧赴援是日與傅先宗等晤於建右營議以徐文秀劉明燈攻新路坡傅先宗楊世俊攻黨川鋪十九日分道併進各賊壘槍礮如雨官軍整隊猛進總兵銜副將歐陽吉星副將唐尉廷越壕先登立破新路坡一壘援賊沂河蠡至張仲春率部禦之賊殊死鬪徐文秀派隊循山梁出賊之後賊乃敗走時提督李漢卿及歐陽吉星唐尉廷等奮威衝殺連破賊壘奪獲礮械無算楊世俊傅先宗各督所部縱橫盪決立將黨川鋪各賊壘概予掃平三十日徐文秀回三甲集劉明燈回康家巖各防所傅先宗抽振威前營填紮各廢壘正月初四日賊復

乘夜於新路坡迤東振威前右兩營之間復偷築三壘更據爛泥溝四莊一壘爲犄角之勢糧路復梗初五日傅先宗率同提督王得勝彭國忠攻三壘未克初六日復同楊世俊攻之三壘環峙每壘約千賊皆以善槍者穴處牆下另以悍股力抗官軍王得勝彭國忠攻其左楊世俊攻其右傅先宗攻其前刀矛旣接戰士踊躍爭先援賊盡卻官軍分撲三壘壘賊槍礮並發各軍冒險直前力拔木柵弁勇帶傷者多傅先宗振臂大呼自執大旗先進突爲飛礮所中由右額貫顙立仆陣前援賊及爛泥溝守賊見大旗忽倒從後擁至楊世俊揮兵力戰王得勝彭國忠等將傅先宗昇回則氣已絕矣初七日陳湜商派徐文秀率所部裹糧赴援會師爛泥溝鼓勇進攻立將四莊一壘悉數攻克斬馘頗多乘勝再攻三壘賊固守不出始收隊而還初八日楊世俊以傅先宗所部主將戰

沒軍心不固商令振威一營親兵三營退紮黨川鋪以通糧路賊乘築壘未就分股來犯徐文秀等合傅先宗所部擊卻之初九初十日賊攻石坡梁各營均經楊世俊隨營擊退然傅軍旣退石坡梁各營勢殊孤懸糧路益梗楊世俊亦力主解圍退紮之議徐文秀已赴援轉戰至黨川鋪見太子寺東西官軍解圍退紮慮大東鄉之賊乘虛犯葦家山各營梗其歸路飭所部回葦家山一帶原防自率所部兵三百駐強勇中營助守以資鎮壓十一日大風揚沙賊乘勢攻傅部振威前營及強勇中營徐文秀率所部出營迎擊甫將賊擊退是夜賊以全力復撲營壘振威前營營官副將田大勝強勇中營哨官千總張承前同時棄壘而遁傅部親兵中營哨官參將李天禧都司徐正華千總文志懿熊得勝等以營官張得勝幫辦林正祥均先出營養傷軍中無主亦相率潰退徐文秀

憤極率所部親兵傍壘列隊鏖戰時許身受三矛力竭陣亡總兵鄭守南李其祥楊文林劉篤志副將劉才華王福昌參將吳明勝遊擊陳東海都司李相南張有才舒有貴均沒於陣壯士同時殉者一百四十餘人時夜深月落官軍與賊莫辨弁丁百餘從重圍中殺出繞由狄道回營報知陳湜陳湜飭董家山三甲集康家巖各處營壘嚴扼要隘一面馳稟臣宗棠得報立派布政使王德榜接統傅先宗之軍查明首先潰退統領營官罪狀一面嚴加裁併以期復振飭總兵沈玉遂接統徐文秀所部後路及果勇各營調楊世俊所部提督張仲春帶五營紮黑山頭邊併催飭前調提督譚拔萃等六營總兵張福齊等五營提督甘大有等五營兼程赴安定聽調陳湜商派沈玉遂陳廣發等滾營進逼擇要安營傅先宗所部護運之已革總兵敖天印時駐高家集距太子寺三十餘

里堅守營壘斬逃者以徇於是各營潰卒遂止不奔齊入附近各
舊壘楊世俊令所部先扼狄道河橋斬逃者飭都司何建威率所
部五營紮蓮花山據稟收隊後查悉平西營營官參將銜遊擊王
勇軍功韓祿總兵周道欽已棄所部隨潰卒遁去王得榜行抵狄
道查點傅先宗所部各軍記名提督河州鎮總兵王得勝紮高家
集彭國忠紮太平山總兵朱運廣紮虎牢關均扼太子寺竄狄道
之衝逆首馬占鰲等訶知甘南各步營潰退未遠三甲集董家山
黑頭山一帶官軍正在增壘復進而安定站灘柳林溝一帶護運
之軍日有增加其安定新調各軍方絡繹奔赴亦知官軍之不可
力抗也因遣回目馬俊馬正元馬全福馬成龍唐成貴等詣三甲
集行營涕泣求撫請遵准撫各條先繳馬匹軍械乞官軍暫緩進
剿陳湜見其情詞似頗真切然同情多詐猶慮其假求撫爲緩兵

之謀一面飛稟請示一面遣撫定回目馬壽清赴太子寺覘之臣
宗棠以辦回之道不外勦撫兼施如果傾誠來投自當仰體 皇
仁網開一面惟該逆等於窮蹙之後忽稍得逞得逞之後忽又投
誠似其中或有別故密飭陳湜相機處置姑許其速繳馬械暫緩
進兵聽候酌奪二十一日馬壽清自太子寺回營具言河回各頭
目遵諭盡繳馬匹槍礮刀矛頂經立誓永無反覆並稱西甯回目
馬永福等亦到太子寺竄赴肅州之陝回崔三禹得彥已於正月
初二日折回大小南川均具稟署西甯知府馬桂源赴安定乞撫
馬占鼇於上臘十六日亦稟求馬桂源乞撫聞馬桂源已到蘭州
十七日馬桂源果隨同道員馮邦棟自蘭州到安定稟見並帶同
撫回陳林閻興春前來臣宗棠詳詢一切據稱與西甯回目馬永
福所告馬壽清者脗合並面呈上臘十六日馬占鼇所遞央保投

誠稟詞極爲迫切蓋因逆黨及撒拉回逆傷亡過多又聞西甯陝回土回及米拉三溝回眾均已就撫番部亦聞風響應出路已斷勢極窮蹙故也比馮邦棟馬桂源至三甲集則馬占鼐等已先繳馬七百餘匹槍械五六百件計自正月二十三日起截至三月初八日共繳馬二千六百餘匹叉子槍九百餘桿刀矛四千餘件見尙陸續催繳按日呈送馬占鼐馬尕大等詣陳湜馮邦棟前跪訴一切涕泣如雨陳湜諭以禍福令悉數呈繳馬械毋蹈金積故轍自取滅亡馬桂源回安定稟覆賊中疑懼情形漸釋各回目催繳馬械亦甚踊躍從前助逆各回及撒拉等回均已歸故巢各處回民知官軍准撫均歸家及時耕種適然不驚察看輪誠乞撫情形屬實臣宗棠飭新調各軍仍連營康家巖沙泥站一帶與前敵各軍聯絡一氣晝夜戒備候示進止俟各鄉馬械悉數呈繳取具各

回目並無隱畱切結然後委員編審戶口散給門牌乃言撫局也
又奏甘南諸軍馬隊共九營均因前敵料草爲難戰地又在巖谷
險峻之處不利馳驅去冬傅先宗楊世俊均將所部馬隊遣赴鞏
昌一帶就地餵養聽候調遣嗣因賊擾運道馬隊正在鞏屬截剿
未嘗調赴前敵故此次潰退祇有步營而馬隊均尙完整查步營
在後護運者敖天印所部屹立未動張仲春所部遵調赴三甲集
士氣仍奮此無庸置議者也惟傅先宗所部營哨官副將田大勝
參將李天禧都司徐正華千總張承前文志懿熊得勝當徐文秀
力援苦戰時棄營先遁致徐文秀勢孤力竭與壯士百四十餘名
同時戰沒覈其情節實無可寬應請旨飭正法軍前以昭炯戒記
名提督河州鎮總兵王得勝補用總兵朱運廣記名提督彭國忠
不能嚴督所部極力堵禦庸懦無能均應請旨革職畱營以覘後

效據楊世俊稟所部營官總兵周道欽遊擊王勇軍功韓祿於移營高家集之先棄營潛逃已飭嚴拏正法楊世俊所部營壘距賊營僅祇里許糧路隔絕傳先宗陣亡後勢難久駐其退紮尙有可原惟當徐文秀血戰捐軀時未能迅速援剿咎有應得念其平時打仗勤奮應請旨革去勇號褫去黃馬褂降爲參將畱營帶隊以覘後效區區愚忱竊以傳先宗徐文秀之殉合計將弁勇丁傷亡實數不過二百餘員名退紮不過三十餘里於局勢雖無大礙然甘南諸軍狃於從前姑容積習非覈明功罪從嚴懲處切實裁撤歸併以求精實不可此外弁丁有無潰退情形見在仍飭陳湜王德榜悉心訪察分別辦理一面挑汰歸併以策全功又奏臣前據署理西甯府知府馬桂源稟西甯各廳縣老民頭目馬永福等呈稱西屬回眾以封齋起衅兵燹十年其間良莠不一見在認真改

過乞賜撫綏請委員來甯查辦等情並准西甯辦事大臣豫師咨
同前因當以同情反覆不敢稍涉遷就擬豫定受撫款目觀其能
否遵行咨准豫師覆稱款目內已量增數條俟馬桂源回甯時會
列三銜出示令其帶往曉諭並委員會辦等語覆加參覈尙稱周
密又據馬桂源詳據大通縣回目稟請委員驗收馬匹器械其情
詞迫切與府屬公稟略同自應併飭委員同時辦理查道員馮邦
棟爲化平撫回所信服陳林赴西甯時轉相告語該屬回眾傾慕
更殷此次陳林接崔三等來函央求馮邦棟前往受撫西甯撫局
自應併飭察看辦理以免紛歧又奏查徐占彪自高臺縣稟報上
年十一月十九日行次甘州府探悉陝回先期遁赴肅州遂抽帶
三營於二十七日馳抵高臺與成祿會晤卽於是日接防以步隊
兩營分紮撫彝高臺兩屬派總兵胡應芳帶馬隊百餘騎護送委

員赴肅州南山各堡採買糧食十二月初四日抵清水地方遇賊
零騎駛至蓋不知徐占彪之來也胡應芳策馬緊追約五六里大
股二千餘踵至胡應芳揮隊迎敵適清水都司胡祥麟團紳王惠
等率團助戰陣斬悍賊數十名而奪其馬餘賊敗遁徐占彪初六
日在臨水得報卽夜親率步隊三營赴清水迎剿成祿亦派守備
鍾文遠帶所部一營同行急馳一百五十里初七夜二鼓抵清水
瞭見相距數里板坂火光熒然知各莊據賊不少初八日黎明徐
占彪令提督陳春萬由南山小路進守備鍾文遠繼之參將吳占
勝由北面河灘進徐占彪自率親兵馬隊百騎步隊一營由中路
進賊倉卒齊隊抗拒適左右兩路畢集徐占彪怒馬衝入揮各營
從賊莊中穿出立斬悍賊數十賊大駭而奔官軍整隊緊追五十
里至金佛寺槍礮連環轟擊斃賊不知其數騎賊徑奔肅州徐占

彪因裹糧已盡畱步隊一營馬隊一營駐清水而自率所部及成祿派去一營還高臺勇丁雖僅陣亡二名而沿途凍斃者十名凍傷者九十二名亦可見行隊之苦矣據逃出難民李八斤子供此股爲崔三禹得彥胡天喜等逆眾約三四千本擬回西甯行至清水不知被何處官軍擊敗過兩日後又有大兵進剿兩仗賊中死傷甚多有認得旗子的說是從蘭州西來人馬人人害怕走回肅州恐官軍追擊十一日卽出關去矣適徐占彪所部歸化營營官安杰自肅州偵探回營稱崔三禹得彥等敗回肅州後恐大兵跟蹤追來又虞官軍殺其大小南川家屬卽於十一日出嘉峪關安杰於臨行時始得見面據稱賊之本意赴平涼投誠見已竄肅州慮求撫不能取信恒擾特甚決意從關外繞道返竄西甯就撫也惟前此出關竄擾安西所屬之陝回馬祥順及蘭州回目馬明擬

就徐占彪處求撫請自備馬械效力贖罪密具稟詞交安杰呈遞
徐占彪擬進肅州先據肅州城南三十里之紅水壩遏肅賊南竄
之衝一面調駐涼之馬步各營由涼拔赴高臺會隊齊進爲規取
肅州之計臣已飭其相機圖之肅城踞賊無多徐占彪勇於赴敵
似收復之期亦當不遠成祿此次出關較從前自易據署甘涼道
蕭宗幹稟報成祿所收征糧已足今春三月之食又撥徐占彪軍
糧內五十餘石歸其發價收買行糧可期充裕至其出關遲速則
臣不能懸揣也曹克忠本是宿將聞其爲人性情直爽亦急思立
功西陲惟接統銘軍新舊交替之際實難孚洽所募新軍一時未
及訓練若遽強其爲邊塞數千里之行恐中道逃亡在所不免應
否飭令李鴻章寬籌餉項抑減營就餉俾得從容整理以免掣肘
之處伏候 聖裁 上諭軍機大臣等甘南官軍進攻太子寺賊

巢兩次失挫傷亡將士多至二百餘人覽奏曷勝憤懣傳先宗所部營哨官副將田大勝參將李天禧都司徐正華千總張承前文志懿熊得勝當徐文秀力援苦戰時棄營先遁致徐文秀等勢孤戰歿實屬罪無可逭著左宗棠將該員等卽在軍前正法以昭炯戒記名提督河州鎮總兵王得勝補用總兵朱運廣記名提督彭忠國不能嚴督所部實力堵禦實屬庸懦無能均著革職畱營以觀後效提督楊世俊因糧路隔絕移營退紮情尙可原惟於徐文秀力戰時未能迅速援剿亦有應得之罪姑念其平時打仗勤奮著革去勇號褫去黃馬褂降爲參將畱營帶隊以示薄懲至辦回之法原應勦撫兼施惟須大加懲創後網開一面使知畏威懷德方爲一勞永逸之計此次官軍疊次失挫賊勢方張忽復遣黨投誠難保不首鼠兩端陰懷詭計見在雖已陸續呈繳馬械左宗棠

仍當察看情形妥慎籌辦以免後患所有新調各軍著飭與前敵諸營聯絡一氣嚴爲戒備毋爲奸回所乘西甯土客各回及陝回崔三等均各乞撫是否出自真心並著左宗棠穆圖善豫師督飭道員馮邦棟前往察看相機妥辦毋稍遷就徐占彪抵肅後擬先紮營肅州城南之紅水壩遇賊南竄之衝並調馬步各隊由涼州拔赴高臺進規肅城著左宗棠檄令激勵將士迅拔堅城毋任久踞刻下肅州軍務既有徐占彪一軍足資勦辦成祿所部軍糧可敷數月之食該提督卽當拔隊啟程迅速出關不得再涉遷延其出關後需用糧食應如何源源接濟俾無缺乏之虞仍著咨商左宗棠妥籌辦理將此由六百里各諭令知之○左宗棠奏西甯府屬貴德及丹噶爾兩廳遠界邊荒漢番雜處同治十年夏間陝回據西甯南川一帶兩廳戒嚴八月十二日賊五六千由江拉尕壤

溝攻貴屬亦雜什汛堡偵知帶有皮筏蓄意渡河署貴德營遊擊魏國恩安布河防分隊飭千總鄧連喜進援亦汛並馳告署貴德同知兼署丹噶爾同知劉肇瑞由丹撥勇來會劉肇瑞飭丹屬練總陳洛藏以馬隊四百赴援另飭王重斗等分守四境要隘十三日鄧連喜率隊渡河賊依山爲營散掠各莊分股攻亦汛甚急因約漢番難民強健者千餘人十四日徑薄賊營殺守營賊三十餘名奪獲皮筏四百餘箇賊分股回援陳洛藏帶團踵至賊始解圍去十八日賊由亦汛山後闌入丹屬南路池漢李哈地方王重斗悉力抵禦劉肇瑞馳調西北兩路健丁助之陳洛藏亦帶馬隊回防十九日擇要設伏再督團丁分路猛進槍礮連環刀矛攢刺賊護賊返走且戰且行伏兵突起截擊賊大潰追殺二十餘里棄賊盈路計斃賊三百餘名嗣據探稱是日槍斃僞帥余逆二子畢逆

虎逆均帶槍傷逆黨有糾眾復仇之說仍激勵各團扼隘以守二十六日賊果大至就日月山南臺連營暫住該處偏近青海是夜海風大作雪深尺餘凌晨黑霧迷漫團丁以槍礮測準賊營轟擊賊旋退去二十七日抵賊紮營處尙有斷矛殘桿堆積灰燼聞蓋燒以禦寒者賊遂不復再至九月間撤防又奏臣上年肅清中北兩路後由中路進規河州除渡洮各軍外中南北三路均酌畱防軍勻紮護運兼授零匪先後據提督蕭章開陝安道黃鼎等報稱誦知股匪二百餘竄中衛縣屬之廣武提督蕭義勝追之十一月二十五日遇於炭山斬二十餘名二十七日有賊踰邊牆攻牛家營堡提督何玉超馳援賊敗遁十二月初七日賊騎百餘竄炭井提督譚拔萃潛師以往出其不意斃賊十餘名餘賊回竄提督劉治均又由石空截殺十餘名十三日馬步賊數十人入觀音寺張

家小莊都司吳元超掩殺十餘名守備張維新繞扼要隘悉數捕殺又據陝西提臣雷正綰咨開十二月初八日有股匪竄章州張家塘東山良回馬守成集團迎禦十四日捕獲逆目金忠才於紅溝窯斬之十八日與逆目馬天簡賽滿喇戰於小柳墟總兵易元壽聞警馳至夾擊獲勝斬賽滿喇並從匪二十餘名馬天簡馬天彥金忠明金忠彩等突圍去半角城撫回丁飛鵬報稱金忠明馬天彥行經半角城爲所追斬金忠彩亦爲匪黨馬三海所戕遂密約馬三海誘馬天簡斬之馬三海挈眷屬三十餘口以降呈驗首級屬實已飭赴固原州安插正月二十日都司穆進善獲賊謀訊有河州竄出李萬海等二百餘騎據田家溝二十一日馳往檢守堡賊十名聞賊擾李俊堡回剿獲勝殺賊二十餘名餘匪竄逸南路糧運絡繹尤賊所垂涎十一月二十六日馬步賊二百餘竄鞏

北三十里鋪提督周文翔夜襲之殺賊三十餘名生擒十一名查出逆目張魁斬之十二月二十日賊騎三百餘竄五里墩提督梅開泰迎勦獲勝跟追遇伏整隊擊之賊又敗二十一日賊竄狄道二十里鋪鈔劫馱騾總兵葉占魁追斬十餘名二十三二十五兩日總兵王光福擊賊於窯店均有斬馘二十八日都司陶達德護運赴三河口遇賊騎五百餘擊走之斃賊數名二十九日周文翔護運至熟羊城賊騎冒雪攔劫鏖戰兩時許始退踞三十里鋪挑奮勇壯丁乘夜襲勦賊驚覺逸去正月初二日周文翔又於熟羊城擊賊獲勝初八日回空糧車七十餘輛至東峪溝賊由溝出盡劫其車騾葉占魁力戰奪回擒斬甚眾是日梅開泰護至謝家堡遇賊斬逆目馬三胖十二日賊劫甘溝糧馱追擒悍逆張三娃斬之秦州運道亦時報匪擾提督殷華廷田連考等往來鈔擊時有

斬擒正月初六日田連考遇賊松樹溝殺賊十餘名初七日跟追至張家灣又殺賊五六十名援賊大至田連考及副將田應祥均身帶多傷扼紮平南川初九日賊撲營壘斃賊百餘名其分股至娘娘壩亦經田應祥擊退零騎又蔓及榆樹壩初十日殷華廷強鳳岐擊卻之臣聞報加檄總兵裴思朝尤成章副將楊德俊參將馮桂增以所部馬隊往賊已由平南川竄楊家山二十日及賊於白蠟峽鏖戰獲勝殺賊六十餘名生擒三十名二十九日追抵禮縣黑家巖繞前截擊殺賊多名越日分路進剿該逆已由西河馬塢一帶回巢中路站灘柳林溝一帶山徑紛歧賊每由沙泥一帶履冰渡河潛伏伺劫十二月初八日馬步賊千餘犯副將楊正茂營盤楊正茂擊走之十三日回空馱騾七幫至新田鋪被賊要截劉明燈躡追未獲徐文秀追抵沙泥斃落後賊數十名奪回馱騾

二十餘頭十七日總兵戴定邦護運至胡麻嶺賊由山凹橫截而出戴定邦督隊擊退聞站灘及楊泗川防營有警率隊馳援身受多傷尙裹創力戰圍始解糧馱亦無遺失正月初八日糧五幫行經柳林溝爲伏賊所劫甯夏鎮李佑清追之未及王衍慶聞信設伏水磨川二鼓後有賊潛入川口總兵黃宏藻倏起猛擊賊驚而奔次日窮搜無迹十一日大股逆回數千圍柳林溝營壘李佑清憑牆力禦斃賊數十名十二日王衍慶率隊赴援分道鈔殺賊踰山狂竄其靜會一帶亦時有零匪出沒正月十八日探悉會甯城南高界陵有賊伏匿提督周紹濂飭總兵周曙良率隊掩捕斃賊數十名又追斬賊目張五等數十名生擒十名二十日按山遇馬步賊百餘名自山凹出官軍猛進殺賊數十名臣維北路零匪無多回逆所注意擾運者亦祇在中南兩路卒之各營分段嚴防前

敵軍糧轉饋未誤見已一律安謐運道無虞報聞○予甘肅陣亡提督傅先宗徐文秀祭葬世職加等並建專祠總兵官鄭守南等十一員祭葬世職加等附祀徐文秀專祠○予安徽陣亡副將吳秀於原籍建祠子都司國榮附祀○戊子加賞普濟堂功德林賑米二百石展期兩月○己丑欽奉 慈安皇太后 慈禧皇太后懿旨著於本年九月十四日冊封皇后禮成後卽日冊封慧妃其瑜嬪珣嬪冊封日期著欽天監於十月內擇吉舉行○諭軍機大臣等杜嘎爾奏籌撥各隊分布防剿一摺賊匪三百餘人見由公阿畢爾米特旗漸趨東南竄近桑錦達賴等處烏喇特爲賊竄熟徑防剿喫緊杜嘎爾已檄成山永德各帶吉林黑龍江馬隊前赴烏喇特交界洪科塔拉地方暨達爾漢貝勒旗和林果爾分投堵剿卽著飭令該兩軍星馳前進扼要嚴防遇賊卽擊杜嘎爾仍當

將存營馬隊趕緊挑補整飭隊伍前赴適中地方相機勦辦毋稍大意該逆此擊彼竄飄忽靡常並著定安富勒琿督飭防軍勤加偵探聯絡防剿以免疏虞賽爾烏蘇爲糧運要路杜嘎爾以賊勢東犯擬於奎昌等前調察哈爾馬隊一千名內截畱五百名仍防哈爾尼敦騰出富珠哩一軍守賽爾烏蘇以衛糧道自係先其所急卽著飭令該副都統帶隊前往防守毋稍鬆懈將此由六百里各諭令知之○庚寅諭軍機大臣等景廉奏催調馬隊派兵西進並請飭文麟撥兵援助各摺片據稱該營兵力單薄必須馬隊助剿擬令吉爾洪額統帶黑龍江官兵五百名由科城徑赴奇古以期便捷等語吉爾洪額所帶馬隊業經杜嘎爾奏報啟程見在行抵何處著奎昌志剛多布沁札木楚常順保英查明飭令迅速前進卽由科布多徑赴奇台古城一帶聽候景廉調遣成祿前調吉

林黑龍江馬隊各五百名該省已報啟程到西路後景廉亦可會商調撥以資厚集景廉已派營官金永清帶領一營先赴古城駐紮並經理屯田事宜以資兵食卽著該都統悉心經畫督率後路各營陸續進發相機攻剿毋稍遷延兵勇長途遠役該都統務當妥爲駕馭恩威並用以固軍心景廉軍營需餉甚急前由西征糧臺運解餉銀六萬兩成祿何以全行截畱實屬不顧大局著成祿卽將前項餉銀分撥景廉應用派員護解赴坤以濟急需濟木薩迤南大河口一帶通迤化吐魯番爲逆匪往來必由之路景廉以威儀後營營官李生元熟悉該處情形請調該員前往扼守著文麟卽飭該員管帶所部勇丁馳赴古城擇要駐紮以壯聲威軍功柳天祥探悉伊犁軍情所稱俄人纏頭漢回各懷爭鬪之心勢不相下等語是否屬實仍著景廉隨時派員確切偵探據實具奏榮

全行抵塔爾巴哈台後行知俄官定地會議刻下辦理情形若何
著該署將軍妥慎籌辦詳細奏聞將此由六百里各諭令知之○
展五城煮賑兩月○癸巳允瑞麟奏調福建輪船赴廣巡洋○甲
午諭內閣左宗棠奏請將護理道員革職摺問一摺撤任護理安
肅道花翎四品頂帶竇型前在肅州時諸事惟同逆馬四之言是
聽且目漢圍爲土匪迫令散團從教復借官銀賞賊竇屬悖謬已
極竇型著卽行革職摺問交左宗棠嚴行審訊按律定擬具奏○
諭前因張廷岳等奏參達爾濟縱賊達颺及伯克瓦齊爾等附和
招降等情先後降旨將達爾濟革職摺問交奎昌多布沁札木楚
杜嘎爾訊擬具奏並將伯克瓦齊爾等分別撤任質訊茲據奎昌
等訊明達爾濟被參各情請旨辦理等語此案已革總管達爾濟
於上年九月閒追賊至畢畱圖招地方賊已被困廟內並不就地

撲滅輕聽賊匪投誠之言致令乘夜逃竄實屬咎有應得惟念該員旋在喀雅喀喇烏蘇地方剿賊獲勝其從前帶隊亦尙得力達爾濟著免其治罪仍帶革職處分畱於軍營責令管帶察哈爾馬隊剿賊以觀後效公奇莫特多爾濟札奇魯克齊伯克瓦齊爾同在畢畱圖廟東南地方列隊賊匪潛由該處竄走又復捏詞稟報希圖卸過情殊可惡姑念該員等前在庫倫防剿尙屬出力奇莫特多爾濟伯克瓦齊爾均著革職畱營效力以示薄懲張廷岳等輕信屬員之詞並不詳細查明率行參奏實屬不合張廷岳阿爾塔什達均著交部議處其擒獲賊黨著奎昌等分別辦理○丁酉諭軍機大臣等禮部奏據朝鮮咨請奏一摺並將原咨鈔錄呈覽據稱上年十月間有伐木匪民七十餘人乘夜越界屯聚朝鮮杜芝洞山間嗣復聚多人渡江放火焚燒房屋經該國礮勇擊斃數

名仍屯聚下流金昌里對岸旋有王陽春韓五亭等投遞約書均各散去等語匪民越江滋擾大千法禁所稱該國平安道厚昌郡究與盛京地方何處毗連見在匪徒雖經散去惟事關冒禁越境亟須徹底查明嚴行懲辦著都興阿瑞聯飭令該處地方文武嚴密查拏妥爲辦理嗣後仍當嚴禁偷越毋使再有出境滋擾情事並著禮部卽行知照朝鮮以安藩服禮部摺及朝鮮原咨均著鈔給都興阿等閱看將此諭知禮部並由四百里諭令都興阿瑞聯知之○己亥諭軍機大臣等劉嶽昭奏派軍出境會剿興義賊匪一摺貴州興義府城踞匪及新城賊巢久爲滇黔兩省邊患前據曾璧光等奏貞豐克復派兵進規興郡新城茲據劉嶽昭奏見派副將吳奇忠等管帶忠義等營由興義縣進征知府李維暹等管帶銳字左右營由普安廳進征並派道員沈壽榕馳往興義督率

會期卽著劉嶽昭岑毓英飭令沈壽榕於行抵興義後卽行會合
黔省官軍將進剿機宜妥商辦理曾璧光當檄令吳德溥等迅速
督隊合力剿擊將興義府及新城等處剋期攻拔毋稍延緩此次
雲南派出各軍所需糧餉軍火並著曾璧光妥籌兼顧毋令缺乏
將此由五百里諭知劉嶽昭岑毓英曾璧光並傳諭周達武知之
○辛丑大學士瑞常卒晉贈太保予祭葬諡文端入祀賢良祠○
癸卯允喬松年奏飭山東撥銀五萬兩修築運泲二廳隄工○甲
辰諭軍機大臣等文麟奏肅州回逆出關肆擾暨李生元所部未
能拔隊赴濟木薩各摺片肅州大股賊匪復行出關攻陷雙塔堡
汛城頭起賊隊已有竄赴敦煌之信該處本有威儀馬步隊及新
中營勇丁駐紮防堵卽著文麟飭令各營會同戶勇及在城官兵
協力堵禦毋任賊匪深入成祿當率所部剋期出關迅將此股竄

匪盡數殲除鼓行而西不得再涉遲延致滋貽誤景廉後路轉運事宜據文麟奏稱哈密車駝短缺又乏餘糧轉運難於籌辦請令鎮迪道出關專辦後路轉運各事宜等語鎮迪道員缺已有旨簡放恩綸照景廉所請令由北路赴任所有景廉後路糧運著左宗棠另派道府大員兼程出關妥爲料理以濟軍食該大臣派員出關勢難迅速仍著文麟隨時設法兼顧毋稍膜視哈密東路時有賊氛李生元所部駐紮二堡未能調赴濟木薩一帶見在張玉春等已率所部馳抵景廉軍營該都統酌度情形或能另撥一軍協防濟木薩俾李生元所部仍駐二堡以免空虛著隨時會商文麟妥爲籌畫賊有撲犯哈密之說著文麟勤加偵探實力防範不可稍涉疏虞將此由六百里各諭令知之○庚戌諭軍機大臣等常順保英奏回匪分股出竄請調撥馬隊防剿一摺據稱探報回匪

二萬餘眾分爲兩股一股由索倫錫伯格圖路撲犯烏科一股由巴勒巴爾海春住拜新圖賽哈諸路竄擾庫倫等語賊匪大股出竄深慮乘虛撲擾逞其詭謀烏科兩城防守事宜關繫緊要卽著奎昌志剛多布沁札木楚常順保英妥籌布置勤加偵探加意防剿不得稍涉疏虞其庫倫防務著張廷岳阿爾塔什達先事籌備以固邊圉前據杜嘎爾奏滋擾阿畢爾米特旗遊牧之賊竄近桑錦達賴等處該副都統擬赴適中地方相機督剿此股賊匪見竄何處該逆股數不一奔突靡常杜嘎爾務宜斟酌機宜嚴飭將弁偵賊所向實力截剿並將竄庫竄烏之路派兵嚴密堵禦毋任匪蹤擾及常順等以大同官兵孱弱請將蘇彰阿所帶兩起馬隊調赴科城惟烏城兵亦無多此項馬隊是否可以調撥著奎昌常順等會商妥辦大同兵遠道抵防甚屬不易若遽行裁撤未免可惜

著常順申明紀律認真訓練俾成勁旅以資捍禦將此由五百里各諭令知之○王子諭軍機大臣等張廷岳阿爾塔什達奏庫倫情形今昔不同請量爲變通一摺據稱庫倫孤懸草地無城無池向未設兵戍守遇有事務須調取圖車兩部落官員差委往返需時見在事務較繁擬將圖車兩盟之協理將軍和貝飭令每年輪班在庫聽候差委該處近接俄疆請由圖車兩盟蒙兵內每季輪班派四百名分駐四隅防守與將軍和貝輪替休息所有烏城駐班卽責成賽札兩盟將軍和貝按季輪替圖車兩盟毋庸赴烏城駐班其賽札兩盟所屬毗連俄國之卡倫距庫較遠請仍歸烏城將軍管理遇有烏庫交涉事件彼此咨商關照等語所陳各情係爲因時變通起見惟如該大臣所奏是否烏庫兩處均各得宜並有無流弊之處事當更改舊章不厭詳求著金順奎昌志剛多布

沁札木楚張廷岳阿爾塔什達統籌全局彼此悉心會商據實覈奏張廷岳等原摺著鈔給金順等閱看將此由五百里各諭令知之○癸丑以孟夏時享 太廟 上前期親詣行禮○諭軍機大

臣等左宗棠穆圖善奏西路官兵迎剿竄匪一摺大靖古浪永昌一帶時有賊匪竄擾雖經官軍迎剿獲勝仍恐游氛不時出沒致擾春耕仍著左宗棠穆圖善督飭各路官軍嚴密防範隨時搜捕毋任紛竄前敵各營失利後左宗棠尙未續有奏報見在情形若何敗挫各營如何整頓近日有無戰事殊深廛繫西甯土客各回及陝回崔三等前於官軍疊挫賊勢方張之時遣黨投誠殊恐另有狡謀左宗棠務當熟審賊情妥慎籌辦不可一時輕信致爲所紿目下如何辦理暨官軍賊勢近日情形若何著左宗棠隨時詳細奏聞將此由六百里各諭令知之○是月豁免甘肅河州等二

十四州廳縣暨沙泥州判紅水縣丞所屬被擾同治元年至八年應徵額賦緩徵陝西府谷縣被雹本年額賦

夏四月甲寅朔諭軍機大臣等德泰奏駐藏辦事大臣恩麟於戴琿拉旺奪結勦辦不法總堪布班墊頓柱一案並不查照達賴喇嘛咨報違例擅賞拉旺奪結花翎上年巡閱三汛營伍恩麟並未親到於旋回前藏時蒙混奏稱逐一查竣且於巡捕戈什哈等擅行賞戴翎支各等語恩麟德泰同辦一事理應會商辦理何以於戴琿等擅行賞戴翎支且該辦事大臣於閱伍未到之處何以具奏逐一校閱卽著恩麟按照德泰所奏各節據實明白回奏毋稍隱飾原摺片著鈔給閱看將此諭令知之○允戶部議酌增烏里雅蘇台官兵暨調防滿洲索倫蒙古兵丁領款銀○乙卯諭山西按察使蔣凝學速赴本任接統防軍○丙辰諭軍機大臣等邵亨

豫奏陝邊近日防剿情形並探聞甘省軍情一摺安邊定邊地方均有賊騎數百擾及雖官軍擊敗遁竄惟我軍亦有傷亡且逆蹤飄忽靡常北山與甘省毗連處所逼近邊牆草地游匪時虞竄越卽著邵亨豫督飭延榆綏鎮道將北山一帶防務實力籌辦並著嚴飭譚仁芳管帶所部剋日拔赴延安一帶相機防剿毋稍鬆懈勇隊之不得力而擾民者迅卽妥爲裁撤騰出經費調募得力勇營以資鎮撫延榆各屬本係地瘠民貧卽應檄飭該管道府督率牧令招撫流亡廣爲開墾州縣優劣卽於是分毋得有名無實至回逆投誠一節疊諭左宗棠察奪妥辦茲據邵亨豫奏探聞河州西甯回目先後乞降呈繳馬械甚多回酋馬占鼐等四人各質其子陝回崔三禹得彥等自肅州敗竄亦赴西甯投誠惟狗齒牙一股不肯歸降見敗竄慶涇交界之驛馬關等語回族眾多原無盡

勦之理惟性情反覆無常時虞挾詐不可不防仍著左宗棠豫師體察情形妥慎辦理近日撫局有無端緒如何辦法並著隨時詳細奏聞前敵後路仍應加意嚴防慎毋爲賊所乘其狗齒牙一股著左宗棠穆圖善飭令雷正綰等督軍痛勦迅殲醜類慶涇接壤陝省邵亨豫尤當嚴飭在防各軍實力堵禦毋任竄越將此由五百里各諭令知之○諭杜嘎爾奏竄匪回遁探蹤進剿一摺據稱本年正月間阿畢爾米特旗屬博羅諾木汗地方突由西北竄來賊匪二三百於二月間向西竄走巴勒達勒多爾濟旗亦有西來賊匪數十名於二月間回向西遁由察里勒圖察汗德勒地方竄入胡濟爾圖和碩等處見已回遁等語據奏各情似此股賊匪由烏里雅蘇台附近竄出見又向西回竄匪蹤飄忽靡定究竟來自何方竄往何處杜嘎爾已拔隊由中路進兵務當確探賊蹤擊

痛剿毋任日久蔓延賊情詭譎並須防其多分股數四面牽掣致官軍應接不遑乘閒竄擾完善地方匪蹤前趨東南近又西遁烏城防務甚關緊要庫倫雖稍遠賊氛仍虞再犯著奎昌志剛多布沁札木楚張廷岳阿爾塔什達隨時偵探互相知照一遇賊匪竄近立即痛加剿洗毋稍疏懈杜嘎爾營中駝隻疲乏遠道運糧未能得力該副都統已商令四子部落等旗派員幫同委員就地雇覓民駝以資應用著定安傳知各該旗妥爲照料不得稍涉膜視賊勢既分並著督飭防軍相機堵遏毋任竄近烏喇特等旗境張廷岳等前奏逃回蒙古男婦報稱有正月閒賊匪帶二萬餘眾分犯烏庫之說嗣復探得西路竄匪有二千餘人之多此次杜嘎爾所奏回竄之賊僅二三百名及數十名是否分股逃竄他處是否另有匪徒竄匿著張廷岳杜嘎爾等查明據實具奏將此由五百

里各諭令知之○戊午諭軍機大臣等景廉奏二起官兵拔隊西進肅逆竄陷瓜州援軍失利西路各營情形請添設臺站各摺片景廉所部靖邊前營見已拔赴古城所有駐紮哈密各營仍著督催前進以資厚集該都統以兵力尙單請調科布多駐紮官兵惟近據常順等奏探聞回匪有分竄烏科之信方以大同官兵孱弱難恃尙須整頓且該城止此兵力亦未便遽行抽調所請著毋庸議金順尙在包頭一帶未據奏報啟程其吉爾洪額所帶馬隊早經拔隊見已行抵何處仍著奎昌志剛多布沁札木楚常順保英查明飭催速赴奇古一帶聽候調遣孔才所統各營本係烏合之眾人心不無參差惟刻下西路軍務與其遠調官兵難期應手不若就地取材較爲便捷景廉務當曉以大義妥爲駕馭俾其躍踊用命以壯聲威回匪與安集延旣構釁未已亟應整頓隊伍設法

進取榮全前議挑選索倫等項人眾會合鄉團規取瑪納斯等處
不爲無見仍著榮全察看情形妥籌辦理伊犁近日情形若何俄
人曾否會議並著隨時具奏肅州回匪竄陷瓜州署安西協副將
柳致勝援剿失利爲賊所掠用銀贖回殊堪痛恨著交部嚴加議
處署安西州知州王秉鏞以催糧爲名日久未回州城顯係規避
取巧著交部議處近時關外賊勢若何安西等處城防緊要文麟
當隨時兼顧派兵援剿毋稍疏虞此時肅州一帶有徐占彪專司
勦辦成祿卽應迅速出關將安敦玉等處竄匪悉數掃蕩鼓行而
西與景廉會合進兵不得再行延宕致誤戎機景廉擬添設臺站
五處著照所請辦理需用馬匹及應支鹽菜口糧等項卽著景廉
開明數目知照奎昌如數撥給文碩前奏沙山子等處屯田事宜
著常順保英酌度情形派員董率經理以資軍食將此由六百里

各諭令知之○已未諭軍機大臣等豫師奏辦理西甯等處撫案情形等語西甯回匪及陝西崔三等乞撫業經左宗棠等酌議章程派遣員馮邦棟前往籌辦見在米拉溝等處回目冶成林等復帶同黨眾赴豫師軍營呈繳馬匹器械已交馮邦棟一併辦理該回眾等情急乞命雖似可信惟向來撫賊之法難於剿賊非辦理盡善必貽後患左宗棠豫師務當懷遵疊次諭旨督飭馮邦棟體察情形妥慎籌辦不得稍涉大意俟辦有端緒卽行據實奏聞將此由五百里各諭令知之○以直隸災歉減長蘆傳辦活計銀兩○予故河南南陽鎮總兵官王萬釗附祀提督楊鼎勳祠○予江蘇太倉陣亡參將王國安祭葬世職○庚申左宗棠奏河州撫事漸可就緒馬匹已繳過三千四百餘匹叉子槍及長矛雜標已繳過七千餘件隨教漢民已拔出六百餘戶安插安定縣轄各境回

日馬占鼇馬尢大等復自限半月投繳馬械悉數完畢再請委員
察驗情狀尙屬可信前敵各營及護運各營均就地興屯廣行耕
墾臣復將河內所繳馬匹分別畱營及填補驛馬餘均散給各州
縣貧農據各處稟報流亡稍聚荒絕之產耕墾日多入春計難民
戶口散給種籽賑糧經費已屬不資然兵屯民屯星羅棋布災民
日眾土地日闢無論地方可冀漸次復元將來糧食日多採運之
費亦資節省矣甘南一帶軍務宣旨漸決潰逃將弁田大勝李天
禧徐正華張承前文志懿熊得勝等并飭及時裁汰撤遣籍隸外
省者給以盤川勒令歸籍籍隸本省者給以賑種勒令歸農察看
情形已就肅謐其西甯撫局已飭道員馮邦棟前赴平番會商妥
辦准豫師咨稱米拉溝回亦急思就撫徐占彪前准收撫之陝回
馬長順等旋因成祿殺護送寶型之陝回二十餘名疑懼不釋遂

挈其眷屬赴西甯就撫見飭馮邦棟一併察辦徐占彪報續獲勝
仗肅州逆首馬四受傷回城亦有投誠之說據署甘涼道蕭宗幹
稟涼州甘州所屬近均安帖驛路疏通是嘉峪關以內似有肅清
之望也其陝甘各回零騎剽掠在承平時亦所難免然至多者不
過二三百騎少僅數十騎除南路北路中路各營隨時投捕均有
擒斬逆猷漸消近惟狗齒身一起三百餘騎竄擾花馬池及陝西
定邊安邊等處雖據蕭章開兩次掩捕擒斬近百名並奪其馬然
逆賊見兵卽竄未能聚殲聞已東竄臣已嚴飭劉厚基成定康督
令防營迅圖撲滅料亦無能爲患耳 上諭軍機大臣等河州回
目馬占鰲等已呈繳馬匹器械自限半月悉數完繳再請委員察
驗米拉溝回眾亦思就撫昨據豫師奏報已諭令該大臣妥慎籌
辦甘省回族眾多性情狡譎見雖乞撫是否真心悔罪尙不可知

且議撫後必須措置咸宜使彼族輸誠悅服方免滋生事端該大臣總當籌畫萬全慎益加慎斷不可掉以輕心遷就了事致異日重煩兵力該回等每以乞撫緩師恐力東作俟春耕事畢仍圖抗拒官軍此等詭計尤應嚴防是在該大臣酌度機宜妥爲籌辦免致爲其所紿西甯撫局應飭馮邦棟詳慎辦理肅回雖有投誠之說並未大受懲創仍應嚴飭徐占彪實力勦洗均毋墮逆回狡計其狗齒牙一股及零星回騎左宗棠當督飭各營迅圖撲滅掃蕩逆氛以靖疆圉將此由五百里諭令知之○辛酉設化平川廳訓導照磨外委各一○癸亥諭軍機大臣等王文韶奏援黔官軍掃除賊巢一摺清水南岸開懷香鑪山等處賊巢次第攻破凱里以北業已廓清見在逆眾麕聚烏牙坡一帶恃險負隅賊勢已形窮蹙著王文韶飭令龔繼昌戈鑑等乘此破竹之勢奮力進攻毋稍

鬆勁並飭唐本有等從凱里一路合兵進剿四面兜圍以收聚殲之效曾璧光亦當督飭黔軍會合楚師聯絡進取總須嚴密布置將該逆就地殄除不可縱令逸出致貽後患所有已復地方一切善後事宜仍著曾璧光遴派妥員悉心經理以靖苗疆將此由五百里諭知曾璧光並傳諭周達武王文韶知之○予貴州陣亡副將王宗高等祭葬世職○甲子御史袁承業奏河東鹽務積弊諭鮑源深認真釐剔○丁寶楨請調閩省輪船赴山東巡防允之○丙寅停江蘇淮關傳辦活計○庚午諭錢鼎銘籌撥吉林官兵整裝銀兩並命李鴻章等迅解吉林欠餉○諭文煜王凱泰調撥輪船赴牛莊海口巡緝○辛未諭軍機大臣等王文韶奏蕩平苗逆巨巢大略情形一摺貴州苗匪疊經官軍剿敗悉數竄聚烏牙坡一帶本年三月間黔楚各軍併力兜剿將烏牙坡賊巢攻毀黔疆

逆苗全股一律蕩平覽奏實深欣慰著俟詳細情形奏到再行降旨宣示該逆悍酋如金幹幹包大肚等曾否擒斬著曾璧光等查明具奏並著飭令各軍按捕餘匪毋畱遺孽所有地方善後事宜並投誠黨眾應如何安插彈壓之處曾璧光等務當悉心籌畫妥爲經理其援黔各軍應如何分別撤畱著王文韶斟酌妥辦將此由五百里諭知曾璧光並傳諭周達武王文韶知之○癸酉諭何璟等籌撥銀兩添造江甯駐防軍裝○允奎昌等奏改建烏里雅蘇台石城並整頓臺務○甲戌諭瑞麟等迅解西征協餉○戊寅翰林院侍講孫詒經以天變疏請修省 上嘉納之○以庫款支絀諭內務府力求撙節○己卯諭內閣朕奉 慈禧皇太后 慈禧皇太后懿旨據通政司副使王維珍奏請益廣孝思以臻豫順一摺覽奏殊深詫異皇帝沖齡踐阼於今十有一年侍奉晨昏孝

養無間當亦在廷臣工所共知王維珍摺內所稱先意承志幾諫不違並孝思維則基諸宮庭等語不知意何所指似此任意揣測信口妄言實屬荒謬王維珍著交部嚴加議處原摺著卽擲還○諭大學士兩江總督曾國藩於本年二月閒因病出缺當經降旨優予卹典並於湖南原籍江甯省城建立專祠生平政績事實宣付史館一等侯爵卽令伊子曾紀澤承襲其餘子孫幾人令何璟查明具奏候旨施恩旋據何璟英翰李瀚章先後臚陳曾國藩歷年勲績英翰李瀚章並請於安徽省城建立專祠又據何璟遵查該故督子孫詳晰覆奏披覽之餘彌增悼惜曾國藩器識過人盡瘁報國當湘鄂江皖軍務棘手之際倡練水師矢志滅賊雖屢經困厄堅忍卓絕曾不少渝卒能萬眾一心削平逋寇功成之後寅畏小心始終罔懈其薦拔賢才如恐不及尤得以人事君之

義忠誠克效功德在民允宜疊沛恩施以彰忠盡曾國藩著於安徽湖北省城建立專祠此外立功省分並著准其一併建祠次子附貢生曾紀鴻伊孫曾廣鈞均著賞給舉人准其一體會試曾廣鎔著賞給員外郎曾廣銓著賞給主事均俟及歲時分部學習行走何璟英翰李瀚章摺三件均著宣付史館用示眷念勳臣有加無已至意○諭軍機大臣等文麟奏回匪竄擾敦煌瓜州堡等處撲入安西官軍擊退賊匪情形各摺片肅州逆回屢次出關竄擾敦煌安西等處勢甚蔓延敦煌北湖等處踞匪疊經兵勇擊退見已遠遁其撲入安西之賊亦經官軍擊退惟該逆來去無常仍應隨時嚴密防範安西屢被賊匪闖入實屬防守不力文麟見已調派營官周鼎遊擊張忻各帶兵勇前往助守著卽飭令會同在城官兵妥籌守禦毋稍疏失署西安協副將柳致勝援剿失利前經

景廉奏參業經交部嚴加議處文麟所請從寬免議之處著不准行仍著文麟責令該員督率官軍認真防剿以贖前愆敦煌安西等處居民疊遭蹂躪情殊可憫文麟當督飭該地方官妥爲撫恤並董勸耕種毋使失所成祿屢奏部署出關究於何日啟程著該提督懍遵疊次諭旨速籌進發不得再以肅逆牽掣爲詞稍涉延宕將此由六百里各諭令知之○是月減免貴州興義等九府貞豐等五十州廳縣暨冊亨州同大塘州判錦屏鄉縣丞所屬並古州衛被擾節年額賦

五月甲申朔日食○免熱河騰圍旗民租課三年○乙酉諭內閣昨日御史李宏謨奏請勤召對一摺覽奏實堪詫異自朕御極後兩宮 皇太后垂簾訓政勵精圖治惟日孜孜召見臣工訪求治理本年入春以來 慈禧皇太后聖躬時有不適仍以勤政爲心

無閒召對迨三月初旬以後 聖體違和久未痊愈始月餘未經視朝然四月二十六日猶力疾召見軍機大臣嗣因 聖體尙未大安是以連日仍未召見李宏謨近在京師豈獨毫無聞見竟以逐日召見爲請嘵嘵瀆陳冒昧已極朕意本欲從重懲處乃我

皇太后以廣開言路之時特降 懿旨加恩免其褫革仍傳旨嚴

行申飭○予浙江陣亡殉難知縣楊尙瑛等祭葬世職○丙戌諭內閣御史袁承業奏近聞太監在京城內外開列多鋪並蓄養勝春奎戲班於園莊各處演戲竇屬大千禁令著總管內務府大臣步軍統領順天府五城一體嚴禁並隨時稽查如有前項情事即據實奏明從嚴懲辦○諭軍機大臣等曾璧光等奏下游官軍連克賊巢驛路疏通一摺前據王文韶奏黔楚各軍業於三月間攻克烏牙坡賊巢逆苗全股一律蕩平此次曾璧光所奏尙是正月

以前之事刻下大股苗匪既經剿平亟應趁此大軍未撤之時搜捕餘匪妥籌善後以期一勞永逸王文韶前奏摺內聲稱苗匪棄械投誠者萬餘人竄投黔軍就撫者亦復不少此項降眾應如何設法安插必須妥慎籌辦其著名首要各犯如有在逃未獲者亦當上緊購捕務絕根株免致死灰復然以上各節著曾璧光周達武王文韶督飭各軍會同該地方官悉心商辦不得苟且了事致貽後患上游興義一帶踞匪近日攻剿情形若何應否抽調下游官軍助剿之處著曾璧光等酌度辦理將此由五百里諭知曾璧光並傳諭周達武王文韶知之○予貴州陣亡總兵官周定埜四川傷亡總兵官劉爲美甘肅陣亡遊擊楊文嵐祭葬世職○已丑諭軍機大臣等景廉奏探聞西路軍情派兵西進暨安敦地方被賊竄擾情形各摺片烏魯木齊回逆見與安集延彼此攻擊景廉

當乘此機會隨時確切偵探設法進取將醜類悉數埽除收復疆
圉該逆曾差人赴趙興體營投誠未允所請嗣後如同逆安集延
等復有投誠之說景廉仍當妥慎籌辦斷不可爲其所紿孔才辦
事未能妥協景廉已派提督張玉春馳赴古城會同孔才辦理防
剿並屯墾事宜著卽飭令該提督悉心部署以資戰守徐學功回
營後尤應妥爲駕馭令其帶隊進剿並將趙興體營勇隨時加意
拊循俾爲我用靖邊中營已赴古城後營及親兵營亦陸續調令
赴坤惟駐紮安西之靖邊左營一時尙難開隊著景廉催令楊定
邦將該營趕緊募補足額剋期啟行毋任延宕景廉軍營餉需久
絀各省專協各餉著戶部催令各該督撫迅卽如數運解以濟要
需並著奎昌多布沁札木楚志剛額勒和布各將所屬臺站竭力
整頓酌派駝馬接運景廉軍營餉銀毋稍遲滯安敦被賊竄擾與

文麟前奏略同該逆雖已東竄難保不去而復來仍著文麟懍遵前旨認真防剿撫恤居民靖邊左營見須西進文麟當飭令安西州豫備車輛行糧俾利遄行毋稍膜視將此由五百里各諭令知之○癸巳左宗棠奏提督徐占彪稟報前駐涼馬步正月二十五六等日陸續拔赴高臺飭步隊兩營一紮河西壩一紮清水以顧運道派馬隊一營步隊二營於二月初一日偪紮距肅三十里之紅水壩成祿亦以兩營紮臨水初九日騎賊數百駛至距紅水營盤二三里往來窺探馬步三營同時出擊賊撥馬疾走初十日騎賊千餘向營猛撲官軍以馬隊居中步隊分列左右槍礮環施賊殊死鬪自辰迄午官軍分三面各結方陣合力偪進賊始敗退追十餘里斃悍賊數十名二十九日探有騎賊向東南出掠追之不及三十日各營分伏全家灣東南十餘里截其歸路賊亦偵知繞

路回竄追及全家灣賊列隊抗拒戰歷兩時官軍愈戰愈奮賊不能當紛紛敗退追至河山子復回旗死拒官軍鼓勇直前賊復敗竄回城三月十五日零賊攻臨水對河民堡騎賊爲援官軍擊之獲勝擒斬數十名十六日賊攻老鶴堡屯莊兵至賊遁躡追及城城逆出馬步千餘亦經官軍擊敗探報逆首馬四議糾死黨爲背城之戰徐占彪卽輕騎率隊馳赴前敵二十一日飭步隊四營分伏距城十里亂古墩樹林中飭右營馬隊列其東南防援賊自率馬隊以團勇爲導會同署安肅道何元普由南河沿越朱家莊抵南關壕外誘敵賊啟東南兩門出紅白旗馬步逆眾近前迎拒步賊趨伏壕邊渠內意俟官軍逼近突起乘之徐占彪且戰且退賊蟻擁跟追將至亂古墩伏兵分路突起徐占彪揮軍夾擊賊不能支返奔及壕遂憑險死拒又子槍施放如雨官軍奮威衝壓槍矛

排進斃悍賊甚眾城中復出藍旗綠旗花旗悍賊三路來援官軍躍渠直進縱橫盪決連環施放洋槍及劈山礮雜以刀矛斃賊極多適朱家賊堡亦出賊來援徐占彪豫飭正營馬隊勇丁兩哨堵其莊口斃賊數十名立將外圍攻破賊不能出逆首馬四見事急帶黃旗死黨由東南兩門蠡擁來援何元普飭臣宗棠親軍礮隊參將蕭蘭玉把總李道修等向賊叢中連放開花大礮子落之處人馬紛倒馬四因坐馬傷蹶翻跌下地徐占彪所部正營營官徐春先驟馬向前擬生擒之忽右膊爲飛子所中馬四乘閒逸去官軍及團眾爭先掩殺賊大敗回城陝回馬長順率紅黃旗馬賊千餘由南山一帶往來衝突徐占彪令右營營官齊懷松結陣禦之副將桂錫楨由臨水遵調率所部馬隊三營馳至助戰成祿所部副都統明春署南州鎮王子龍等乘勝繼進賊愈不支爭趨入城

自相踐踏官軍追抵門廂賊急拽浮橋閉門死拒其不及入城者陷投泥淖悉爲官軍戮斃是役也鏖戰四時之久斃賊實數約六七百名受傷者約千餘名官軍弁丁陣亡三十五員名受傷者亦二百有奇蓋血戰也二十三等日訊據被裹難民供稱是役悍賊死黨殺斃轟斃及帶傷垂斃者不知其數城中巷哭該逆洵懼異常馬長順先擬赴西甯求撫至是以未得先往羣相詬詈徐占彪所部回勇頭目安杰入城訶知備實以賊中情形具告無異詞也又奏竊甘南北路逆回狗齒身卽楊繼芳馬才棕李萬海各起向匿鹽固東西兩山嗣因官軍技捕甚急竄歸河州本年正月以後河回求撫該逆等以無地可容仍偷竄北路爲賒死計臣聞報飛飭陝西提督雷正綰提督蕭章開左日升道員魏光燾各軍嚴密剿捕正月二十八日雷正綰所部副將趙連科偵知羅家胡同

有步賊劫掠趙隊趣之斃匪數十名生擒李四箇子等十二名訊
係陝西馬生彥股眾由河州與狗齒牙各起同時出竄者二月初
三日騎賊數百竄黃蒿灣雷正綰檄隊兜剿初七日副將李積慶
襲賊於元套子賊驚起挺鬪弁勇猛進斬悍賊三十餘名餘眾鼠
竄初八日狗逆攻馬家河堡駐堡哨弁嚴守卻之平明賊東竄總
兵易元壽設伏丁家溝賊至伏起截殺十餘名追抵護書溝另股
步賊出淘河口來援敗賊亦回戈力鬪易元壽身受矛傷馬亦傷
蹙乃裹創易馬以戰總兵金品勝分隊鈔擊賊復敗走追殪數十
名十一日總兵鄧林楓邀擊於康家灣十三日左日升截殺於魏
家地坑內頗有斬獲賊向花定一帶狂竄十八日犯定邊縣城防
營出擊遊擊秦正明守備馬憲章歿於陣署定邊副將王雲孚率
兵勇繼進賊始退十九日副將李萬盛劉文彩接餉還定襄糧蹕

追是夜襲賊於柳樹嶺斃十餘名二十日延綏榆鎮劉厚基派隊赴定換防行至安邊三里灘倉卒遇賊參將銜遊擊劉秀維匹馬陷陣連殪數名被賊攢刺力竭陣亡安邊防營踵至賊乃西遁老湘軍提督湯彥和聞警赴援二十二日甫抵定邊賊已竄近湯彥和率隊截擊不虞老湘軍之迅至也駭而奔猛追四十餘里斬馘四十餘名擒獲二名二十五日追及於左家團賊又遁三十日提督蕭元亨調賊駐紅柳溝乘夜馳往斬三十餘名署延榆綏道成定康派所部提督彭緒斫二十四日擊賊於定邊境獲勝二十八日賊匿郭家寨迤東知縣饒兆麟擊走之二十九日圍賊於黑梁子逆目馬小五一股全數殄滅三月初二日彭緒斫在高家灘擊賊亦有擒斬初四日賊仍竄定邊湯彥和追及狗逆騎賊約二百瞥見旗幟卽狂奔猛追四十餘里斬馘十餘名賊分兩股逃逸一

南竄一奔瓢井湯彥和向瓢井躡追數日無蹤初九日師抵三義
土人告以前六十里廢莊逋賊往往伏匿湯彥和潛師夜起距莊
里許遙見火光分隊鈔入賊驚起四竄立斬四十餘名其南竄一
股初八日竄洪德城初九日總兵熊道濱接仗互有殺傷十五日
由本鉢鎮越山北竄左日升追殺十餘名二十四日竄石溝驛二
十五日湯彥和各營截之新東坡斃賊二十餘名二十六日雷正
綰飭易元壽截之長流水賊潰圍出追至燕子川沿途斃賊二十
餘名生擒十一名四月初二日參將雷天恩率馬隊馳抵苦脈井
賊憑隘死拒雷天恩下馬力戰副將郎永清以精騎襲其後賊不
能支奪路竄走逐北約五十里斃悍賊四五十名盡奪其馬生擒
四名餘賊滾溝而逸擒賊供稱狗逆及馬二利木所騎之馬皆官
軍所得追急時該逆脫衣落荒而竄未知已否伏誅趙連科亦於

是日追賊於長峪河賊結隊疾行已殲落後賊數名正躡追間賊拚死返鬪趙連科左手受刀傷四指均墜藍翎千總周保泰陣亡賊亦負創向北草原竄去初五日郎永清在高臺堡截斃四五十名餘眾潰散又奏鞏秦階一帶山谷阻深向爲土匪游勇出沒之所臣分飭馬步諸營扼要駐紮探蹤雕剿擒斬頗多正月二十一日總兵尤成章王聲揚參將馮桂增各率所部分途追賊於西和縣境之雪水河賊敗踞山峽廢堡負隅死拒尤成章等下馬率隊蹂登奮擊斃賊二三百名生擒十一名是日另股逆騎百餘闖入階州屬白馬關該署州判羅映霄先期會同副將楊隆昌赴白楊灘按捕另股踞賊二十三日聞警馳回賊已退竄署把總周德身受矛傷幕友知縣李舒萼縣丞郭怡副將孫萬榮同時遇害二十九日王聲揚率隊至崖城馬鞍山堡逆騎麇至遂依山列陣俟賊

竄近火器齊發賊負創返走仍踞中川王聲揚料賊回竄必由杜家堡夤夜踰山設伏二月初一日賊分其半護牲畜在前餘分三路在後王聲揚與從九金森從山腰突起憑山下擊賊棄所掠牲畜狂竄官軍躡追奮擊殲賊百餘名初八九日零騎竄向略陽界另股犯太石山守備李宏珍擊走之初十夜賊襲階州小關遊擊胡彪憑卡轟擊凌晨賊退探知徑竄大關胡彪率隊赴援與守備周正秋夾擊獲勝十二夜竄范家河經民團擊退是日王聲揚擊賊禮縣屬上方坪地方陣斬十餘名生擒二名十八日賊夜竄拋沙河提督殷華廷副將強鳳岐截擊敗之二十二日殷華廷強鳳岐會同漢中鎮李輝武所部總兵鄧貴華副將劉楚華剿賊康家灣賊分股抗拒經殷華廷等擊卻追抵詹家山陣斬及滾巖死者甚眾三月十三日賊踞西禮交界鐵鎖橋總兵張養吾副將常遠

藻王聲揚會隊疾往賊憑險死拒官軍槍矛排進賊奔潰追殺三十餘里斃賊六七十名救出難民男婦二百名生擒六名十四日賊犯略陽屬郭家壩李輝武所部提督王照南總兵蕭德林追之抵花廠溝鏖戰逾時斬悍賊數十名賊敗遁又追殺多名生擒十名二十二日賊竄階州屬境楊隆昌戰於馬家河斃匪六七十名餘賊竄逸二十四日追及之於麻巖子陣斬數十名追殺及墮巖死者甚眾署階州直隸州知州洪惟善慮尾追莫及檄楊隆昌卽取道望子關相機截擊二十八日偵賊竄長壩乘夜襲之斬數十名擒五名訊據逃出難民供稱此起回逆僅二三百名雜以游勇土匪逆目米相公已在麻巖子經官軍擊斃馬三亦經捕獲正法提督田連考殷華廷聞報馳至賊正合股聚踞木瓜嶺四月初七日田連考等直搗賊巢賊盡棄輜重滾溝越嶺而逃田連考奮威

躡剿擒斬百餘名殷華廷亦有斬獲 上諭軍機大臣等肅州踞逆經徐占彪督隊痛剿連戰皆捷殺斃悍賊死黨甚多城賊恟懼著左宗棠等卽飭令該提督乘此聲威迅拔堅城盡殲醜類惟該逆負固有年仍當穩慎進攻不可稍涉大意甘肅北路零匪經官軍疊次截剿殲滅殆盡惟狗齒牙及馬二利木尙在脫逃該逆皆百戰之餘熟諳地勢亡命鋌走自在意中左宗棠等仍當檄飭各防營分道搜捕務將狗齒牙等逆悉數弋獲淨絕根株甘南階成一帶竄匪闖入白馬關經官軍截剿竄逸餘黨無多該督等仍當嚴飭各將領聯絡一氣探蹤搜剿以靖地方署白馬關州判羅映霄疏防汛地被匪闖入惟因捕賊遠出聞信卽將該關收復著加恩免其置議將此由六百里各諭令知之○左宗棠奏烏魯木齊提督成祿屢奉諭旨飭令出關遷延至今尙無出關確耗計自進

兵西陲於今七載虛糜至艱之餉奚止數十萬而戰績無聞中間
僅報收復肅州而肅州旋被賊踞成祿仍避賊甘屬之高臺肅回
北竄烏里雅蘇台兼出關擾掠安西所屬成祿不能制也陝回由
西甯北擾甘涼與肅回合股成祿不能制也陝回馮均幅實心就
撫成祿受之不肯資以兵力致馮均幅爲馬四所害又不能撫輯
馮均幅餘黨致馬四得以重賂啖之收其悍黨而其弟馮均貴等
遂引其餘眾南附河州成祿且馳檄甘涼各軍沿途截殺是絕其
反正之路也陝回馬長順素稱狡悍當其由河西漏網西竄肅州
出嘉峪關擾掠安西所屬狂飭倏張比聞徐占彪所部西進急返
肅城輸款於成祿成祿請受其撫馬長順又通款於徐占彪請爲
肅城內應忽成祿將護送寶型之陝回二十餘名一夜殺盡而馬
長順遂疑懼不敢回西甯就撫見復與馬四合勢死抗官軍辦回

之道不外勦撫兼施然欲治其詐先示以信欲洞其情先釋其懼
不易之理竇型信有罪矣護送出城之陝回果何罪乎如是而言
撫不可謂信如是而言勦不可謂威據稱欲會合徐占彪共克肅
州而遇事不與相商且故意牽制阻撓之克復之功又將何望成
祿一軍本有專餉臣無從豫聞然念邊塞行軍之苦從未嘗有所
計較亦以公家之財贍公家之軍固無庸其畛域也頻年以來成
祿截畱省糧爲數甚鉅上年欽遵諭旨派徐占彪赴肅州臣飭署
甘涼道蕭宗幹籌採軍糧購運需時飭沿途州縣先以省糧供濟
隨後買補又慮成祿或有違言並飭蕭宗幹於所屬代爲採糧以
資兼顧所以爲成祿計者不爲不周徐占彪師過張掖高臺該各
縣豫碾倉糧接濟成祿奏撤署高臺縣知縣徐應魁而以私賣倉
糧罪之並參西路轉運署涼州知府李守愚不應緘致各縣豫爲

徐軍籌辦行糧實則成祿所截省糧已足敷該軍數月之食各屬分其餘糧以供徐軍數既無多又可隨時採買填補於事理原無不合而顧斷斷如此蕭宗幹代成祿於高臺金塔等處買軍糧五千石原約發銀收糧成祿止發銀五千兩收糧二千石有奇餘銀不發翻奏蕭宗幹虛張其數糧尙無著以此上瀆 宸聰出尋常

意料之外成祿一軍十二營見存實數不過五六營而尙多冗雜前由高臺發兩營赴肅州拉運車二百餘輛半載婦女小孩人所共見久駐高臺蓄養戲班相爲娛宴上年並遣人赴都接取第三妾來高臺荒邊遠塞竟視爲安樂行窩顧安望其長驅塞外一徇公家之急乎西路用兵餉事糧事轉運三者艱窘異常成祿一軍截留省糧加以派捐人數少而軍食充道路近而轉運省故常有數月之儲其各處協餉多寡 臣雖無從查悉然歷詢自涼甘一帶

來者僉謂上年解到協款二十餘萬兩存儲尙多如果決計出關實無不給之慮且奉旨飭催已數月矣此數月中出關固需裹糧以趨不出關亦豈能枵腹而坐與其坐食而徒糜至艱之餉孰如適行而就關外之糧且近又截留奉撥景廉軍餉十萬兩是糧非不足餉非不裕也乃不乘此時急謀出關而仍藉詞諉延日復一日過此以往常有可指之餉不竭之糧任其虛糜乎臣與成祿素未謀面每聞其虛報勝仗心竊憂之近詳察其舉動一切謬率乖張實難枚舉竊謂如成祿者此時遷延不進固失事機卽令勉強出關終難期其振作有爲克當一路臣不敢徇隱自干咎戾應否簡派知兵大員接統該軍並歸景廉節制調遣以一事權而收餉節兵精實效之處出自 聖裁 上諭左宗棠奏成祿糜餉遷延舉動乖張請簡派大員接統該軍等語朝廷以西事孔亟疊飭該

提督星速出關剿賊若如所參各節殊屬措置乖謬亟應確切查辦著穆圖善按照左宗棠參奏各款嚴密訪察迅速據實具奏毋稍徇隱原片著鈔給閱看○諭金順奏赴任未能迅速擬請效力前驅一摺金順簡任烏里雅蘇台將軍自應遵旨迅赴本任以重職守惟據奏稱選帶所部得力隊伍尙不下六七千人需用駝隻甚多無從籌備遣撤兵勇清釐積欠需費又鉅是以稽遲至今未克成行並以烏城竄匪多係河狄西甯等處回逆由肅州甘涼沿邊北犯擬請暫統全軍進紮甘涼鎮番一帶邀截賊竄來路藉保烏城等語該將軍駐軍包頭徘徊觀望於大局毫無裨益姑允所請迅帶所部馳赴甘肅於甘涼鎮番一帶扼要駐紮遇有賊匪奔突卽行截擊毋任紛竄出邊以遏竄烏之路金順接奉此旨卽當趕緊部署將應撤勇丁設法遣撤拔隊日期先行奏報毋再藉口

於餉需不繼任意遲延到甘後並當激勵諸軍力圖報稱將甘涼鎮番一帶竄匪掃蕩廓清毋畱餘孽儻再藉詞延宕不能力圖振作致匪徒鋌走出邊使烏城等處又遭寇警定將該將軍重處不貸金順拔隊啟行應需軍裝轉運費用著鮑源深邵亨豫各於該省應解軍餉內先行籌撥銀十萬兩剋期如數解交金順軍營以資應用其各省應解金順軍餉仍著戶部分催迅解源源接濟毋令缺乏將此由六百里各諭令知之○予甘肅殉難副將孫萬榮陣亡遊擊秦正明等祭葬世職○乙未諭內閣李瀚章王文韶奏援黔各軍攻破賊巢苗疆平定曾璧光周達武奏下游官軍會剿大股苗匪情形各一摺覽奏實深欣慰貴州苗匪張臭迷等自咸豐五年倡亂以來嘯聚黨眾疊陷城池貴東貴西蹂躪殆遍楚蜀邊境亦爲不靖嗣經記名布政使席寶田統帶楚軍入黔援剿貴

州提督周達武亦率所部由蜀前進黔楚各軍節節掃蕩疊將清水南岸開懷香鑪山等處賊巢攻克該逆竄踞烏牙坡一帶負隅死守本年三月閒提督唐本有等分路進剿連克牙塘馬遂猴子劫等處逆巢提督龔繼昌等會合黔軍進攻烏堡冷水溝等處踞匪擒斬收降者甚眾該逆乘雨出竄官軍截擊於挂燈地方陣斬逆酋九大白遂將烏牙坡二十餘里內賊巢悉數踏毀四月閒提督蘇元春等分率隊伍由雷公坪等處授勦而前復斬巨酋巖大五於陣並將逆首僞大元帥張臭迷僞平楊王楊大六及姜老拉潘老冒等先後擒獲逆苗全股蕩平其逆首包大肚金幹幹等股盤踞平茶牛角坡等處經黔軍提督鍾開蘭鄧有德等攻破斬馘無算並生擒包大肚金幹幹及悍黨多名均經正法此次黔楚各軍勦力同心連戰克捷遂使積年巨寇悉數殲除苗疆底定洵足

彰天討而快人心所有張臭迷一犯尤爲苗逆渠魁著王文韶卽將該逆就地正法傳首犯事地方以昭炯戒湖廣總督李瀚章署湖南巡撫布政使王文韶貴州巡撫曾璧光貴州提督周達武均能和衷共濟克竟全功著一併交部從優議敘記名布政使席寶田總統楚軍調度得宜著賞給騎都尉世職○諭軍機大臣等李瀚章王文韶奏援黔各軍攻破賊巢苗疆平定擒獲逆首張臭迷應否解京曾璧光周達武奏下游官軍會剿大股苗匪情形各摺片本日業經明降諭旨宣示此次黔楚各軍合力圍剿克定苗疆著名逆首悉數就擒覽奏之餘實深欣慰所有張臭迷一犯業經解送湖南省城卽著王文韶將該逆就地正法傳首犯事地方以昭炯戒毋庸檻送京師其逆首金大五伏匿香鑪山白水洞並有數百人竄伏香鑪山頂著王文韶飭令唐本有等剋日殲除毋任

鋌而走險致貽後患曾璧光等摺內所稱凱里渡河之賊分股向
鎮遠之路逸去此股賊匪尙有若干人著卽飭令宇文秀等會合
楚軍前截後追迅速殲除毋畱餘孽見在苗疆旣經平定楚省援
軍應如何分別遣撤及擇要扼紮之處著李瀚章王文韶會商辦
理黔省地方疊遭寇亂瘡痍滿目殊堪矜憫見在下游一帶甫就
肅清當以綏輯閭閻爲急務曾璧光務須遴派廉能明幹之員認
眞經理以期地方日有起色黔省餉項本缺見有各營除酌畱下
游擇地扼防及勦辦上游興義賊匪外其餘卽可酌量裁減以絕
經費著曾璧光周達武悉心會商妥爲籌辦貴東道一缺有撫緝
苗疆之責必須得人而理李德莪見在有何別項差委該員於此
缺人地是否相宜著曾璧光據實具奏將此由五百里諭知李瀚
章曾璧光並傳諭周達武王文韶知之○予貴州陣亡副將洪世

齊等祭葬世職○丙申諭軍機大臣等豫師奏見籌辦理陝回就撫情形等語道員馮邦棟由平番進抵碾伯陸續將陝回宋全德等呈繳馬匹器械戶口冊籍分別點驗其軍功馬振鳳等帶到匪夥于潮海馬世魁禹召林等均經飭回原處聽候查辦著豫師隨時會商左宗棠督飭馮邦棟妥實辦理不得稍涉遷就致貽後患同情狡詐誠恐各營因辦撫或形疏懈轉爲該逆所乘左宗棠務當懷遵疊次諭旨體察情形將河州西甯各回撫局安慎籌辦並嚴飭前敵後路各軍加意防範毋稍大意近日辦理情形並著隨時詳悉具奏將此由五百里各諭令知之○予伊犁殉難已革尙書陳孚恩暨眷屬四名分別旌卹加等○丁酉諭軍機大臣等瑞聯清凱奏邊外賊匪滋擾兵勇迎擊獲勝一摺邊外大東溝突有由上江竄來賊匪五百餘名雖經兵勇在榆樹房東甸子地方迎

擊擒斬多名惟邊外地面遼闊逆蹤出沒靡定仍恐去而復來著
都興阿瑞麟清凱嚴飭鳳凰城城守尉及帶兵各員在沿邊一帶
勤加偵探實力防剿毋稍疏虞此次出力員弁兵勇准其擇尤酌
保毋許冒濫此股賊匪係由海洋竄來棄船登岸分股肆擾嗣後
尤應嚴防海口絕其登岸之路瑞麟等前調福建輪船已諭文煜
等酌撥小號輪船一隻駛赴牛莊海口聽調此項船隻到後卽著
都興阿等遴派得力弁兵隨時出洋認真巡緝遇賊卽擊毋任逆
蹤登岸以靖游氛將此各諭令知之○庚子命直隸總督李鴻章
爲大學士仍畱總督任○命前任山西布政使劉秉璋前任廣東
布政使文格前任貴州布政使嚴樹森來京陛見○壬寅諭軍機
大臣等文麟奏官兵截擊西路賊匪情形一摺哈密防守二堡營
官李生元等在三道林等處截剿西路馬賊殲擒烏魯木齊送信

奸細三名惟馬阿布都一名未經弋獲著文麟飭令該官兵認真
按捕毋任漏網二堡地方爲烏魯木齊吐魯番等處往來要隘李
生元等軍在該處駐防尙稱得力卽著督飭該營官隨時偵探嚴
密防範遇有賊蹤窺伺卽行實力擊剿不得稍涉疏虞哈密歷年
籌辦防堵出力員弁准其擇尤請獎毋許冒濫將此由五百里諭
令知之○撥部庫銀五萬兩濟杜嘎爾軍餉○甲辰諭軍機大臣
等曾璧光等奏下游漸就廓清籌辦調撤兵勇安撫降苗暨楚軍
和衷共濟各摺片黔省下游業已底定亟應添撥兵勇力攻上游
曾璧光等已抽調鍾開蘭率三千人馳赴新城興義助剿卽著飭
令該提督會同滇軍併力進攻將該兩城迅速克復廓清上游毋
稍鬆勁其香鑪山孤巢及零星竄匪並著黔楚各軍乘勝剋日掃
除毋令死灰復燃致貽後患楚軍所撫降苗甚眾著王文韶督飭

地方文武妥爲安插彈壓其飢疲待哺者亟應籌款分別賑恤曾
璧光以黔省降苗益眾未能兼顧自係實情卽著王文韶暫由湘
省籌款就近酌給口糧俾生計有資不至流離失所所稱生苗頑
梗性成此後擬令一律薙髮改變服色並不准私蓄槍礮刀械之
處均著照所議辦理並慎選賢能牧令將保甲義學等事宜實力
舉行以冀默化潛移庶可一勞永逸曾璧光等摺著鈔給王文韶
閱看將此由五百里諭知曾璧光並傳諭周達武知之○乙巳諭
軍機大臣等劉嶽昭岑毓英奏攻克永平雲南縣城一摺永平雲
南兩縣切近大理該逆恃爲犄角久抗官軍此次楊玉科李維述
等督兵分投進剿先後將兩城攻克殲除悍賊殆盡並將曲洞濠
溝賊巢攻拔當糧餉支絀之際該督撫能激勵將士奮勉出力殊
堪嘉尙岑毓英見擬將迤南軍務趕緊肅清卽赴迤西督剿勇於

任事必能所向有功惟杜逆久踞迤西根深蒂固見雖藩籬已破恐負隅之志愈堅該撫務當於勇往之中加以穩慎總期謀定後動竟此全功用副委任將此由五百里各諭令知之○予雲南陣亡參將李棟材等祭葬世職○丙午實授王文韶湖南巡撫吳元炳湖南布政使○予甘肅陣亡協領依常阿祭葬世職○己酉諭軍機大臣等左宗棠穆圖善奏馬步兵勇分路截剿竄匪獲勝一摺河州回眾及西甯土客各回既已先後乞撫何以涼州鎮番武威各屬尙有賊匪時出肆擾可見回民種類不一約束難齊左宗棠穆圖善務當督飭馬步各軍嚴扼要隘遇賊卽擊毋稍鬆懈至該回狡譎性成每當耕作之際輒乞撫以冀緩師迨收穫後旋又借端抗拒從前覆轍不可不防左宗棠見辦撫局總當斟酌機宜爲西陲籌數百年之安毋得稍涉遷就致日後重煩兵力見在辦

理情形如何著該大臣隨時具奏以慰廛繫穆圖善另片奏馬隊官兵糧餉請分別報銷等語所有甘肅續調吉林黑龍江馬隊月餉卽著照穆圖善所請劃清年限分別報銷其八年冬間委員辦糧未結商借銀二千五百九十兩零卽著袁保恆照數撥解歸款將此由五百里諭知左宗棠穆圖善並傳諭袁保恆知之○庚戌諭軍機大臣等榮全等奏面見俄官會議情形並俄兵直入塔境各摺片榮全行抵色爾賀鄂普勒地方與俄官布呼策勒傅斯奇會晤該俄官不議及交還伊犁之事並以請示該國爲詞塔境之三工河灣額米斯河老河口等處又有俄兵駐紮本日已令總理各國事務王大臣與該國駐京公使辯論榮全見已旋回塔城著與富和會商布置妥爲防範榮全此時自未便帶兵徑赴伊犁惟伊城情形見在究竟如何應派妥員前往隨時偵探妥籌進止布

呼策勒博斯奇到伊後有無回信仍著榮全酌度情形辦理榮全
前議挑選索倫等項人眾會合鄉團規取瑪納斯城自當速籌調
度先發制人儻能派隊先復瑪納斯城則烏魯木齊近在咫尺可
期與景廉之軍聯絡聲勢景廉所部各營已陸續拔赴古城著卽
督率官軍整頓附近民團相機進取務將烏魯木齊早日規復方
能居中控制以扼西路之衝烏城回逆與安集延彼此互攻各不
相下其中有能去逆效順率眾來歸者不妨寬其既往酌量收撫
俾爲我用並著景廉察看情形與榮全咨商妥辦榮全原摺片著
鈔給景廉閱看將此由六百里各諭令知之